

孝義

孝爲百行之原天性所發本無間於智愚推而廣之行成於內德著於外立身涉世諒無有蹈於不義者矣蓋孝順德也行義之所由基也顧或謂行以孝先乃德之常子以孝著必事之變嘗見顛蒙之士天懷發中亦有動於不自己者又寧必概以歷山號泣閔曾安養哉至若鄉曲布衣敦宗睦族好行其德出於其心之自然是亦修德行仁推本錫類之儔也惟孝與義是爲福基珥筆以書用昭欽錫志孝義

隋田懋德仁恭子開皇初以父軍功錫爵平原郡公丁父
艱哀毀骨立廬於墓側負土成墳文帝聞而嘉之詔表
其閭

唐雍仙高數世同居天子旌表門閭賜粟帛復賦稅有司
歲時存問見唐書孝友傳

金張完父早歿事母以孝母久病妻養母有怠卽出之會
歲稔出粟賑饑多所全活有貸錢者百餘人度不能償
盡焚其券

明王敬飭躬勵行洪武初舉秀才母喪傍徨墓所數日不
忍去父強之始歸父歿廬墓哭奠者三年事繼母如所

生永樂間以孝行卓異旌門子燧由舉人官太僕寺丞
父母繼逝廬墓六年事聞旌表父子並從祀

王起孝正統中以孝被旌

李振民有孝行父歿哀毀廬墓晨昏哭奠會早霜殺禾惟
周廬四十餘畝不爲災且有雙穗之異成化間旌表

李克紀嘉靖間監生赴銓選道出潞安適賊據青羊山克
紀應募往招撫仗義說之事漸平而克紀卒後改青羊
爲平順縣叙功追贈易州判官

楊汝節目不知書親歿廬墓三年絕跡內室有司旌表邑
人馮養志稱爲獨行未俗所難

徐行善事繼母克全子職淡泊自甘時袁繼咸爲學使者
重其行飭縣表閭

姬國瑞諸生撫弟國珮有恩比歿珮撫其子顯廷亦如之
會水漲珮携孤姪跨馬疾馳而聽二子徒涉曰義不得
以吾子先兄子竟兩全焉顯廷舉鄉薦不仕隱於醫

張養心父母歿廬墓六年哀而盡禮官誦旌之勤石以誌
又李瑾舉人令臨淄父母歿亦廬墓

田應運事繼母孝撫諸弟有恩每出粟賑濟鄉隣子大良
庠生力學慕義獨脩學宮泮池

裴養志農夫也有上黨罪人匿里中事發連及其兄養正

論死力請代刑已而兩釋時共稱之

趙倫太僕卿軌祖起解官糧數千緡夜遭賊劫倫拒敵被殺官銀得保有司追給義官旌表

王錫弘治己未進士令新會歷裕州守轉廣州性至孝母老不能侍與人言輒流涕諸公爲繪望雲圖以表之

王珂服賈遠出抵揚子江夜鄰舟被劫珂奮身往救盜驚散商船分金以謝珂堅辭不受一時高其義

張澤性寬和謙順里有惡少肆辱閉門不與校負貸者悉置之生平絕跡公門

楊可楹樂善好施撫孤姪俾成立貧不能婚塋者助之債

不能償卽焚其券絕跡公庭人高其行誼

焦一春事親孝與物無競好義樂施鄉黨稱焦善人有司
累旌其門

石有璞篤厚和光齒德並著庭訓有方人推耆宿

郭紹芳東父落魄嗜酒有意氣嘗出行見一蹇在田食稼
而久不見人疑而控之揣其所負金也會日將暮逐前
跡之一人醉卧道傍諦之爲徘徊李五撼而訊之寔爲
官解銀五百餘兩卽以裝付之五感激願致百金爲謝
固卻不受歸而語妻申氏申氏曰君能處心濟物如此
吾家其或興矣次年遂生東

李濟業性嚴正慷慨好義樂施予邑宰王請與鄉飲壽踰
大耋以令名終

楊文盛老成持重與世無忤教子有方青衿疊出惠澤多
在人口有司褒其齒德

邢堯民端潔嚴肅教子義方救荒恤鄰施恩不居齒德高
於鄉里

崔堂懋德大年屢延鄉飲樂善好義捐貲修文廟子子明
弱冠登第

張崇恩敦本尙寔教子成名雅量寬平人推長者

畢應科古貌古心善事善教解紛排難砥節礪行捐貲以

賑流離典田以完婚葬五十餘年事庶母如一日服勞承事人無閒言

楊朝光善守身勤色養推愛以給妹貧親親以裕外家之後舟麥助喪貸金不責義行種種昌厥後人

田馭華文行兼著家庭肅穆誘啟後學津津不倦屢與鄉飲

緱元珍樂道安貧敦倫重義撫遺孤二十口胥資成立望重藝林

張克正安貧力學絕跡公庭束脩自勵人稱古道君子

王命予篤實純良平生不矜已長不言人過遇荒歉捐金

濟衆衆舉行優

李鶚性喜施予告匱者多寡必應積逋不能償破券遣之
弘治中輸粟賑饑授義官

蘇韶性慷慨歲饑出粟數百以活貧又饑慮民益瘠而懼
還以遁也遂焚券誓于忠事母以孝聞甲申表節孝其
母以節婦並膺旌服里人榮之

國朝蘇天福好義喜施予盜起保聚鄉里賊不敢逼修太
行東路一百二十里山行稱便捐五百金修文廟尊經
閣並兩廡神厨齋宿所身親監督妻亡不暇面訣闔邑

義之

畢一棟家貧常走潞安負米供親日治田山中辰必歸視
飲食父母甘則喜事祖母陳一體父志孝養甚篤父家
世農嗜讀書一棟命子振姬學曰能得爾祖父歡心吾
雖勞不苦也事繼母如所生收葬族之無後者子振姬
積學著聞

李志巒性孝父客於外病歸研醫躬治不愈父卒哀毀踰
禮至煩母米切責及母死廬墓三年人稱其孝又有高
才能文章畢振姬稱其長於用意趙介亦避其鋒銳歿
爲誌之

薛元微馮村里人性至孝父光生病思牛肉不可得元微

割左臂肉以進病遂已知縣白批云割臂救親高平之瑞宜加獎賞以風後人

田多壽魏庄東里人順治六年父生蘭死於兵母史被掠多壽時五歲伶仃孤苦幸得長成康熙九年辭鄉里訪母於都城二載始得傾家產贖歸奉侍終老上下莫不稱之

宋璉米山鎮人家貧父鰥璉奉事必具甘旨務得父歡父好博偶亡錢不憚璉竊知其故貸錢如數僞作拾遺狀以進父喜以爲所遺錢復得也其善承親志類如此時人名其地爲孝子家云

張聯璧諸生母楊性卞急曲意承事母歿哀禮交盡又多
義行贍病妹舅外氏師事崔子明崔故援其家難友人
郭鎬死母子無依迎至家養給終其身著有愛吾廬稿
趙曦諸生獨殯葬祖母仲叔死潁川間關二千里扶襯歸
葬又葬其季叔士杰好樂育人才遠近多師之

宋才少孤事母孝貧依姊夫張某灌園爲生後張老病孤
苦才爲生養死葬人以責逋相詬輒出已貲解之人稱
其義死表其阡

李東諸生父昌文嘗憤貧困携薄貲遊廣南二十年不返
東少長日牽母衣問廣南所在母子時相對涕泣及冠

辭母將往尋會母病久之愈乃爲弟婚娶俾奉母自贖
父雅嗜物徒步走太行山遇盜以挺擊之幾斃至漢口
急附舟沈於水遇救免及抵福山鎮四訪無踪遇客言
父寓瓊遂航海走瓊州訪知父嘗娶妾生女今歿已十
三年妾亦適人矣乃求妾所在問父墓出賣物哭奠極
哀爲女弟擇配乃負父骸北渡瓊海過雷江涉麓湖經
觀音崖暨韓瀧湘潭諸險凡往返萬八千里重趼迸裂
血流被土崎嶇萬苦乃克歸父骸於祖墓製服設奠觀
者萬人事聞 詔旌其門

許貴祖朝家於萬歷間創修南陳通濟橋以便行旅歲久

漸圯貴復重修堅固有加祖孫好義世濟其美

邵綸音奉祖訓忍讓饒三字終身佩服不忘父存日有貸
銀粟者券約甚夥遵母命名貸者各還之一時義聲遍
閭里

朱先正性寬和事親孝謹尤好施予遇貧乏者厚自賑恤
嘗立義學延師以訓村蒙修長途俾行者無崎嶇之苦
王文宇馬村人貿易完縣與葛東岡友善東岡有子悞弗
克自立陰以八百金託文宇無何東岡死文宇教其子
將所遺金還之完縣令孔君爲立碑表其事

牛位坤明諸生幼英穎喜讀書癸酉就試太原會流寇起

中道丞還翼其父避南山中猝遇賊度不獲免委身餌
賊賊執之刃及頸者四斷未及喉血淋漓佯僵卧獲免
寇稍葺發憤卒業鼎革後父卒哀毀骨立服除遂不復
言科舉事平生負意氣分財賑宗黨恤患破產不惜子
兆捷成進士勗以遠大老益好施予年七十二卒

李耀傳國學生性質實好義雍正元年以孝廉方正舉因
老力辭晚益好學分輯府志多所發明

李培甲內閣中書溫厚醇雅中抱淵實康熙壬寅歲稔捐
貲設粥厥食饑者全活甚衆性至孝年踰五十逢先忌
行禮猶伏地爲孺子泣家人掖之始起年六十七卒子

錫誥培甲晚年生竭力事親母卒哀毀踰常父諭之曰
兒獨忘而父耶遂忍泣背常撫膺痛父歿廬墓三年事
庶母一體父心律身儉約至施助承先志不少吝也

李芳貧未讀書性至孝母武病癱瘓扶起卧除穢溺不委
妻孥三年如一日竭力菽水一本誠敬生養死葬貧能
盡禮邑人稱之

趙淑抃字馨蘭廩生工於詩賦品端學邃試輒高等教授
生徒多所成就進士畢溱家貧不能學抃收之門下飲
食教誨卒成之舉人王金鎧亦其高第也鄉人非惟服
其善教胥欽其行義焉

楊純奇字素之庠生賦性強正里居遇公事慷慨剖析是非必公遠近悅服既歿里人立石表其墓曰剛直楊公故思碑舉鄉飲子孫多列學校

司九經石末里人孝友忠厚父喪號泣數千里扶柩禮葬好行其德待以舉火者數十家遇同儕侵蝕默不與較久之其子昌齡請追夙逋怒曰吾爲德而爾爲怨彼力能償寧待索乎吾望爾讀書成名何乃圖此戔戔者於是悉折其券善楷法端居讀書教子不遠數千里博訪名師子昌齡遂爲通儒弟九儀諸生天姿穎異凡陰陽星歷六壬戰陣諸書皆能言其意而於宋五子之書尤

好讀之中歲寄意岐黃獨有心得耽酒有飲德疎財尙義樂善不倦與兄類遠近推之

牛如龍澱洋孫邑諸生性朴質務敦實行持家儉而有禮母宋善病調藥奉饌不假婢妾三年無倦色父歿伯年老且病謝生徒親侍床褥衣不解帶者數載闔邑議公舉其孝行辭曰吾循吾分耳曷堪辱聞與兄友愛終身子官臨朐戒之曰實心爲之無趨巧勿邀名盡一分心卽報一分國年六十一卒於子任

袁九錫議叙衛千總性慷慨急公好義縣文廟傾圮獨

任修葺捐貲一千五百八十兩有奇年逾七旬躬親督

理不憚勤勞殿廡祠宇胥煥然整肅功竣後復置地三十八畝捐銀三百兩存公以脩歲修時葺獨力成事兼圖久遠闔邑義之又嘗修井路二條五載成功費銀七百餘兩乾隆二十四年荒捐貲八百金周濟六庄隣里婚姻喪葬貧者胥仰給焉樂善好施蓋至老不倦云

趙繼芳增生孺慕性成母苦節盡心色養常以不克顯揚爲憾性和平溫厚與物無競及剖是非決可否獨能洞徹事理排衆議抒己見雍正七年奉 詔保舉行優名達部未仕年七十卒

邵煥崧武生年將七十猶懷孺慕事繼母不啻所生親歿

喪葬盡禮教育幼弟有聲庠序撫孤姪成立好施予孝友端方曾經詳請獎勵

李錫銓國學生中書培壽子伯兄中殤父思子成疾銓晝夜籲天願以身代湯藥必親嘗始進及歿喪葬盡禮不櫛沐者三年事繼母姬脩極色養二十年如一日兩弟幼弱伯兄遺孤亦在襁褓撫育訓課胥各成立竭力承繼母歡積勞成疾年四十三卒母哭思其孝養未幾亦卒

李樹庸恩貢生世家子好學有文譽家貧性慷慨有告艱者貸予不吝出重貲修葺廟宇冬置木橋於縣河以便

往來候選教諭未仕終

張煥庠生壺陽公孫濛子也少入學從外祖陳相國讀書京邸聞父病一千四百里六晝夜徒跣而回躬侍湯藥衣不解帶者三年與兄友愛兄無嗣祖遺產業悉讓之俾買妾生子老篤於學多所培植年六十五卒

焦潤貴董自福喬村驛人曉起於路拾銀一襖二人計不義之財不可受相與送驛丞所乃河內縣客李秀環等交驛夫之所遺也從官認領欲分謝二人二人不受當事優獎之

趙爾昭邑廩生弱冠舉優行父亡撫孤姪懇摯事孀母誠

孝在庠三十年啟迪後進有師法弟爾明亦孝友安貧
雍正七年奉 詔保舉居家孝友才守端嚴人才品行
堪任驅使未仕卒

張瑞生便弓馬習韜鈴雍正九年 詔舉智勇兼優之士

督學朱以名應有司促具裝自謂馳驅王事吾志也第
母氏篤老何忍離固辭不允會西師解嚴乞歸盡心色
養母喪畢慨然曰吾今乃可出矣會金川用師輸貲佐
餉授守禦所職未及試卒兄敬生少佐父業於外親老
奉歸補博士弟子員讀書討論古今慨然有經世志勇
於赴義不吝不侈以助餉議叙錫秩

趙家監生品行端方家庭孝友教子有文名年八十強健如少壯鄉里推其齒德公舉焉

張瑞城北布衣賦性淳厚好善樂施與兄友愛析產讓肥
居瘠戚黨待以舉火者甚衆居鄉正直不阿教子有義
方並有聲庠序

郝斯清孝義人武生性亢直好施予與人盡情無隱吐剛
茹柔人樂其坦易歲歉貸貧者粟不責之償助族人舉
四世喪與之貲以養母井坡路圯獨修之通醫蓄藥濟
人常教其子曰人不可不讀書經史之外醫理尤當知
也同堂兄斯滄謹於內行事諸父諸母愛敬兼至待人

以誠未嘗有惡聲厲色同爨百口立之規條內外遵守
無間言稱家督焉

田毓犖邑諸生次何子也醇謹有至性以孝弟稱幼時母
陳有胃疾發輒憂泣不寢食歷久遂病肝鬱居喪哀毀
盡禮後絕意進取兩兄早卒撫諸孤如己子姪孝患疫
家人懼傳染不敢近獨力爲調護卒賴以安年五十六
卒

部世可附監生世業儒事親孝與弟友愛弟歿教育孤子
女如己出與人犯而不校重然諾急患難扶危濟困無

吝古貌古心鄉評重子五俱克繼家聲

張欽璿建寧後里貢生建寧舊有文廟尊經閣年久將傾
璿糾工舉正功未竣而終子監生賡堯繼父志督理告
成立有碑記前任吳以義以孝成匾旌之

李全卬永祿里監生孝友好義每春於閩里量口貸粟及
秋如數以償不計子母韓山法雲寺傾圮出重貲經營
數十載新之勒有石記

楊金枝西社里民性寬和好施予里有龍泉寺將廢金枝
出貲糾衆重修一新年三十喪偶誓不再娶鄰里推其
義行焉

邵燧西陽村人性公直戚里有急賑貸不責其償建文昌

閣於村南水口延師教鄉之子弟率多成就年八十有六卒

李林長受村人相舜子少失母事繼母郤盡孝母染癆嗽之疾卧病二年相舜遠出林見母病危醫藥不効遂割左股肉一塊暗投藥中母服之半月而愈林股半年始痊今其母尙存

侯思玉性至孝父病奉侍湯藥寢食不遑父歿哀毀骨立兩兄相繼亡事母篤於孝養爲兄立嗣產均分焉母歿三年苦塊葬之以禮康熙六十年歲饑貸貲以濟貧者

不責利修葺村中

守蜀任百餘金平性淳雅

貲不恤

孫永祚誠篤好義親老朝夕侍側未嘗少離經營社倉十餘年出入惟謹家故習農獨重文學特設義塾多所成就壬寅歲歉散所儲以賑鄰里居臨丹水秋冬築橋以濟往來厥後子孫奉行不替

李秉忠監生少孤稍長曲體親意教育部姓甥四人助其婚娶堂姪琚週歲喪父一門五孀爲之治田產理家務俾無失所生平好施予和平忠厚母養未終賈恨以歿李淮事繼母秦如所生再從弟幼失怙恃多方撫養爲之婚娶給以田產康熙五十九年歲歉設法運米以濟貧

乏遠族相投留供不替中年而殂妻崔守節撫孤見列

女

王如蘭四歲而孤寡母苦節自力衣食已知憐憫年十五
母病無力致藥餌中夜衣冠仰天拜祝至曉乃止閱三
夜母病已終母之世計力所獲以養未嘗遠離且念父
兄早逝三世遺柩未殯積藜藿之餘葬其祖父及兄並
祖行之無嗣者二父行之無嗣者一外家乏嗣外祖父
母亦葬之

楊上通才短而性孝父母惡之時時撻詈未嘗疾怨妻李

亦克順夫意謹事公姑父昭使貿易江南感重疾歸值

妻亦病父愈怒然夫婦愛敬不少憊久之父始感悟調治之父母歿哀毀致疾妻李禱於柩前願以身代自是誓不茹葷棄產助兄喪葬盡禮夫婦抱疾度日迨年五十精力忽強人爭傳以爲孝感云

王清選少孤事母盡孝母侯失明躬親侍養不離左右二十年如一日母歿喪葬盡禮積勞成疾年甫四十卒

楊增故思文院大使培棟孫性至孝家貧如洗教授度日奉親甘旨每飯必具雖鶉衣不恤也侍父病三旬不解衣父歿水漿不入口者三日喪葬守禮祭祀必供父所嗜至今子孫猶承其志焉

李瑜監生好善喜施予清涼山廟宇傾圯創首捐修又特
建關帝廟於其左助喪葬給藥餌解紛釋事隣里咸
仰之子培恩性至孝侍母病衣不解帶者旬餘叔苦寒
資給頤養之再從兄歿妻携其子他適親往抱歸撫養
之長爲之授室分與產好義樂施一如其父云

隱逸

易稱天地閉賢人隱士君子懷瑾握瑜甘沉淪於草澤
猶得謂爲泰交之運耶願人各有志不容相強堯舜在
上下有巢由箕山潁水高風自越千古得其志而爲之
披裘負薪樂在其中正不得謂孤踪高蹈非士本懷也

高平近太行之麓山深林密冥鴻霧豹間有其人緬想夫風月嘯歌抗懷自得流風如昨往跡未泯掃石壁以題詩訪菑蘭於空谷五芝八桂不禁低徊不置云志隱逸

宋張宗古幼負大志優於文學父母早逝或勸之仕曰仕以行志也親老而養不逮吾志安乎居恒樂善喜施嫁宗之孤女五人瘞貧乏不能舉者十餘喪宗族兄弟有官本郡者屏居山澤不一造其門旣罷情禮款洽如初人稱真孝廉云

張克柔以理學自負性爽慨重然諾屏跡山林布衣蔬食

高子集卷之十四
處之淡然顯者每顧其廬苟非其人則辭而避之

王照質朴有古人風爲學以理道爲主不事章句深居屏迹灌園種樹以終老每接人必稱說格言鄉里感化無少長咸親之

元李希白有駿才時當元季謂鄉人曰此忠臣義士奮發之秋吾力不能而復覩然事之恥也遂屏居無仕進意一時朝士俱知其名

張起巖性嚴重與人寡合獨與韓維學游爲忘年友同隱居龍山號東崖維學嘗語人曰張東崖宋魏野之流也日相過從放歌自得著有泫水唱和集維學亦高士嘗

著有野川文館碑

張才與兄播齊名恬退不仕嘗種瓜自給有竊瓜者反爲之開棘其人慚謝

張汝弼事親孝以詩名世遁跡莒山嘯歌獨行性喜薇自號薇田扁其室曰薇齋

韓嗣宗號丹川隱士舊志未詳其事跡亦高流也

明陳錦性高鯁幼習舉子業恥事勦說後隱於西山之麓曰修不必耀貴不必爵知不必人行不必身竟以此自終時高其操

國朝趙蔚字知岑性安雅沈密志端而行方隱居絕意聲

華博覽載籍尤潛心於性理之學既老猶日玩易象及
春秋傳熟於史氏歷朝成敗興廢之端皆能提其綱於
程子鄉校之陰隙地構齋曰端本掩關獨坐研究聖賢
之奧寡言笑重道義年七十卒司靜山誌其墓稱爲真
處士云

寓賢

路史云舜耕於歷山漁於濩澤小大悅之雄陶方回等
七人不辟而至謂之七友迨既禪始逃之士非其產每
一經過胥艷稱焉高平澤之衝邑也名流問俗長者停
車一時耳目所屬千載想其風流矧當年不乏縞紵之

交他日或有終焉之志寧關土著樂咏自駒志寓賢

唐薛僅字冲用漢御史大夫廣漢後自沛居河僅拔萃起家開元二十年將巡潞藩擇才能俾宿儲供以左拾遺爲屯留令在任七年乃居於高平山別業屯留民懷之徐季鴿爲撰屯留令薛公善政碑

張誨其先世居清河祖嘗爲和川令因家焉誨復徙居高平自號拙菴以文學名世專經術富篇韻所交多一時鴻儒居鄉不苟人胥稱之

宋李常侍福王之後家隴西成紀縣五代時爲澤州守遂占籍高平善治生勤於農桑與傭奴力作不少懈退休

卽讀書鼓琴以修其家學事親處兄弟教子皆盡其道
敦尙行誼遠近慕之五府連辟不就年九十三卒葬於
董寨村

金王謙少沉靜有志操是非喜怒不形於色隨母氏至高
平愛其山水佳麗遂家焉受學於翰林學士王晦元經
釋典九流七畧咸所精練以子貴封朝列大夫卜築西
山直躬化俗有太邱遺風

陳有守字達甫休寧人工詩王仲房曰達甫弱冠從親官
長平一見常評事倫歸而詩名遂起見列朝詩紀有秋
日過大雲寺一首

明張恂陝西涇陽人進士因闖亂潛避高平遨遊山谷以
嘯歌自適

舒聲江南人寓高平米山以潞安籍登鄉舉

宋霸城武人進士避闖亂居高平陳堰村登臨閑適有條
然出塵之想

藝術

詩書禮樂大道寓焉片長薄技致遠通方者所不屑也
顧尺有所短寸有所長嘗見士君子遊心技術超心妙
解侔造化通鬼神藝也而幾乎道矣故夫陰陽卜筮醫
巫音律相術技巧載於紀乘者大率賢智之士借以隱

迹藏名而濟物利人功在一時業傳千古詎得謂區區
末技固不足數歟志藝術

晉王叔和爲太醫令博通經史洞識修養之道精診切纂
岐伯華陀等書撰脉經十卷脉訣四卷脉賦三卷辨晰
最詳張仲景作傷寒論文字錯簡迨叔和撰註編次始
成全書見唐甘伯宗名醫傳考任邑之王市村今土窰

藥碾猶存

辨見
人物

元李肯堂巧思強記善楷書及篆籀之學有西溪法帖行
世

明陳魯少學易入五臺見老翁授開心符魯跪吞之遂明

卜筮陰陽九宮兵法風雨無不立應

王友古博物洽聞尤精天文及九章法且布筭而知人之
隱嘗集渾天敲噐銅鳥漏刻候風諸巧製並圖之以爲
準

李玘少以醫著後善圖緯且能煉形服氣晚年彙釋老而
一之

國朝三銅道人不知何許人諸生成周佐母病喉百藥罔
效一道人過門索蔬具見之曰喉有祟吾爲子手療否
且殆矣擊所持棕扇柄出紅丸七令吞之又彈頂後吐
數肉蛾蠕蠕動旋納之袖中語周佐謝我銅三斤足矣

取以付再出失道人所在殆非世人也遂著三銅道人
傳傳諸人周佐才而有義聲畢振姬與之友

祁惠之上黨人善醫邑人仰賴者衆因卜居於城北村占
籍焉子芳幼聰敏好學其父與講論脉理輒會悟弱冠
徧覽羣書無不通貫療治多效遠近徵請盈門不擇貧
富人服其德公舉爲醫學

仙釋

昔廣成子與軒轅黃帝授道於王屋今道壇臺殿猶存
至西土教宗自白馬駝經青蓮現像遺踪流衍廣被中
華漢唐以來梵宇琳宮鱗次相望昌黎復出其亦不能

人其人火其書矣夫仙釋非聖教也顧魏史並紀靈徵
元史亦傳釋老載籍所錄往往足傳是正不必衍南北
之宗推內外之學而錙元托跡一顯靈奇固珥筆者所
不能沒矣志仙釋

漢費長房修真於邑之南山有提壺賣藥翁日行市中入
壺以譙長房見而異之禮爲師翁曰孺子可教並引壺
中絕非人境遂予竹杖及縮地法數千里頃刻可至後
不知所終

唐李通敏晏六世祖棄科舉學辟穀去妻子隱於西山不
入城市年逾百歲無疾終後有遇於王屋者儀貌如生

因名山暨井爲遊仙

後唐大愚居舍利山調演聲律能達旨要年九十餘一日別其徒曰吾將歸矣端坐而逝洞中嘗聞五音聲後人因以爲名嘗作上心王狀奏六賊表蓋教乘喻言也錄進昭宗並韻母三十字詔賜田百頃祠部牒三十八道紫衣十道有愚公塔心王表碑在金峯

金姬志真號洞明子皇統中遊五岳歸語所親曰人生一夢耳捨宅作觀名清夢服紫衣爲道士見觀碑

元馬仙姑永平人幼慕棲真結屋縣西通義里日以鍊形爲事室旁產香草飛鳥不期而集一日正襟逝後人每

見其星冠霞帔步虛往來立祠祀焉今董峯菴有石楹
卽委蛻處

按孝友睦婣任恤先王以之教萬民祇父恭兄脩之
門內是亦爲政矣推而廣之鄉鄰宗族施德行仁量
力所能稱心而出人心世道詎不益徵古處歟若乃
獨善其身蕭然高蹈士固有各行其志者抑或流連
勝地隨遇可安仁里德隣美兼主客至名成一藝智
巧攸關寄跡方外功脩各著銓綜人物胥附載焉亦
採風者所樂聞也

子之鼎示

今又一

高平縣志 卷之十五

列女

易基乾坤詩首開睢書稱螽降夫婦之道人倫之始閨
房貞順家道以成閩德不綦重歟自劉向著列女傳南
豐叙其意二妃而降名姝淑媛班班可考願閨門之行
絜隱難彰烏頭棹楔或有不及表揚者採風問俗尤宜
加意焉高平山川融結士女胥知重廉恥敦孝慈幅幘
百里巾幘中不乏媿行人物之後悉詳著之所以顯微
闡絜昭風化之原亦猶古人指訓也志列女

元張珊妻曹氏年十九珊亡遺孤甫週歲姑先有贅婿李

姓者利其所有陰與其妻謀鳩兒以絕曹望曹心動乃
寄兒母家憚憚子立恪盡婦道以慰其姑凡五十年所
值李姓者死兒克成立壽九十終奏聞旌表

張國用妻許氏年二十二夫亡誓守奉姑泰定三年詔旌
表又有段傑妻姬氏李鳳妻王氏王平妻張氏俱以貞
節著縣尹郭質奏聞並膺旌表

明張友讓妻王氏年十九歸讓閨十年讓死苦守不移資
女紅奉姑教子足不踰閨弗與宴會終始以禮六十八
終

李韶妻祁氏年二十二韶亡以死自誓舅姑欲奪其志氏

堅持不二內外稱之

王子章妻李氏章死氏欲殉未果值兵亂携七歲兒備歷艱辛歷四十年晚節愈勵

邵深妻璩氏年二十深死端潔自守資織紝以供朝夕有巨姓擇窆慕其賢欲致之不爲動守志以歿墓產紫芝二本縣令劉鳳池有詩

邢琰妻李氏琰早死貧甚親黨諷以別醮氏曰姑在孰與爲養矢死靡他竭力奉姑終老氏亦壽七十有八

生員陳鳳妻李氏明經陳輔母夫亡子幼家貧守志倚紡織爲命教子成立官漢陰知縣以上俱成化七年旌表

李女幼受尙洗聘未娶洗往滇不歸女誓不改適尋以禮歸尙門事姑篤孝洗竟客死典衣飾托所親舁骸骨歸爲同棺之穴而厝苦守六十年卒嘉靖間邑令傅思明表其行立祠祀之

潘文明母王氏年二十餘夫死誓從死自經室中族黨解救得不死勉其養親撫子氏疆起支門戶家貧織衽供甘旨翁姑以壽終四孤成立文明有聲庠序萬歷間旌表邑人劉虞夔序之

廩生郭峻妻田氏夫死年二十七欲殉夫父勉其忍死撫孤姑妬忮將奪其志氏以死自矢子紹芳娶申氏貴家

女曲盡婦道食貧作苦孝養孀姑生子東田年六十九將終曰郭氏四十年一綫之緒得以不絕幸遇賢婦產佳兒吾良人目瞑矣一門節孝至今傳之

汝志拾遺

邢光裕妻郜氏裕負矢戍邊竟裹馬革氏典衣取屍歸殯畢卽縊柩前二女從死有司上聞建坊旌表曰乾坤正氣

牛學孔妻張氏孔疾篤以百金付張曰爲爾後日計氏自忖脫不幸有死而已金何爲夫竟死氏投繯柩前事聞與郜氏同旌

龐暘妻陳氏苦節四十餘年萬歷壬寅詔表其閭復丁二

人邑人馮養志志其墓

舉人邢國庶繼妻趙氏適邢一載而寡年十九姑垂白前妻二子待哺氏食貧勵節奉姑終身教子成立奉詔旌表

張朝相妻李氏年十八夫死子二艱虞萬狀迄於成立長子嘉祥娶李氏次子嘉瑞娶賈氏後兄弟相繼死一姑二媳誓共守節俱以垂白終

宮詹劉虞夔妾畢氏年二十一夔卒撫嫡子元徵於襁褓禦侮全孤歷三十年不渝元徵以胄子官部郎疏請旌表

牛天賜妻梁氏進士牛獨元母年二十九而寡性戇直不苟言笑苦節四十餘年受貤封依然寒素建坊旌表

李經邦繼妻王氏夫歿氏年十七撫前子婚娶成家子婦俱殞又撫孤孫荼苦五十年院道優獎

馮坤妻田氏夫亡年二十五家貧以磨麵爲業茹苦三十餘年院道表閭

李時漸妻張氏漸素貧歿無以殮氏百計營辦後以女工度日教子藻成名院道表其閭

姬佩林妻郭氏年二十生子甫三日而林歿氏矢志撫孤子國澤官黃州知事投牒終養縣請院道表其門

廩生牛星妻薛氏星亡年二十二勤儉持家布衣糲食以撫孤爲事守節五十餘年子孫成立院道表之

李嘉言妻張氏十九喪夫遺孤數月義兄欲以爲利氏截髮自誓勤女工撫幼子垂五十年子春躍補增生院道表其閭

郭守恩妻孟氏年十九恩故撫孤成立守節終身院道旌表

趙金妻李氏金客死氏年二十聞訃哀痛托所親携襯歸拮据營葬姑性嚴氏曲盡孝謹守節四十年院道旌表常太妻張氏太亡氏年二十四翁姑垂白子方襁褓或勸

其改適氏曰老幼將誰依倚耶誓不從院道旌表

郭思恭妻關氏年二十恭亡氏方有娠舅姑衰老氏朝夕奉侍既生子悉心撫養守節四十年院道旌表

李大勳妻王氏年二十四夫死孝親撫孤五十餘載院道旌其閭

郭治禮妻畢氏年二十二夫亡守節四十年門庭闐寂院道旌其門

何春妻王氏春亡氏年二十七閨門嚴整足不履外笑不見齒守節四十年旌表

張孟秋妻李氏年十九秋亡困苦食貧四十餘年未嘗怨

悔

郝慶妻李氏夫亡年二十三撫週歲孤日夜兢兢及長猶不少弛其願復守節數十年州縣屢加旌表

李佩妻朱氏佩亡氏年十九守節四十四年撫孤成立學使表之

牛漢妻苗氏年十九漢亡守節四十餘年長齋繡佛粗糲終身院道旌表

秦自立妻李氏年少孀居撫襁褓子卒能成立邑令上其事歲給粟帛子振英優免差役

韓希愛妻王氏夫亡年二十二事姑撫子以慈孝聞院道

屢加旌表

馮四端妻秦氏夫亡年二十二撫孤應元娶牛氏元亦早
歿牛年十九姑媳守貞撫孤孫昌祚成立有司旌表
李濬澤妻田氏年少夫亡撫育二子棠繼棠緒先後入泮
有司屢給匾旌之

吳守志妻劉氏夫亡苦節勤儉保家州守每加旌獎

國朝監生李棠繼妻田氏己丑夏賊人張斗光劫掠氏避
亂東莊煤窰賊薰攻甚急窰陷被執氏罵曰吾以名門
女適名門豈從汝賊賊露刃脇之罵愈厲立斃刃下時
從賊者無不愧歎

鞏攀桂妻張氏年十六夫亡撫兩月子楨成立荼苦備嘗
閱年八十一奉文立石

生員趙建紀妻王氏年二十五夫死投繯以死遺一女弗
願士林哀之

孝子袁潔母朱氏十八守節八十告終潔廬墓處縣令奉
文立石志之

趙之秀妻程氏年十九夫死姑以家貧氏幼迺令改適氏
紉以服除及期姑設計携往女家道逢數人目注氏氏
覺謂姑曰已被細看往女家何爲別姑獨歸未至家長
號一痛縊夫塚傍時年二十一

張珽妻王氏幼失怙恃育於嫂年十六歸珽珽亦少孤依舅氏以居氏婉婉順從越十載珽遭疾篤慮婦少無依氏泣曰君脫不諱我豈獨生耶及珽卒殮訖氏竟自經死前令梅爲作張烈婦傳

庠生李德恒妻秦氏年十六適德恒孝敬有婦德越十三載夫病革氏泣語曰君無爲我念我必以死殉戒不可恒卒既殯氏以頭觸棺幾死家人守之會翁痛子傷懷憑棺大慟舉家奔勸氏乘間自刎死氏兄訟之官凡六閱月讞平始殯形容不毀面色如生

庠生李業偉妻田氏年二十三夫死事姑教子潔清自守

非至戚不敢入其室學使給扁旌之

李彪妻王氏年三十撫有四子夫亡欲從地下姑曰旣爲彪也妻宜爲子也母不爲子也母愧爲彪也妻氏感泣守貞五十年四子皆成立邑令表其閭

李永欽妻楊氏欽亡氏年二十三家貧遺子焜幼稚勤紡績以教育孤兒焜亦能承母志壯歲舉於鄉學使給匾旌獎

陳尙志妻李氏年十七夫亡無子女孝養孀姑五十年如一日喪葬盡禮有司旌表其門

陳紀妻李氏年十九生子方六月紀亡氏屏跡毀容奉事

翁姑教養稚子守節四十二年邑令旌表

胡璣妻常氏年二十七而寡遺孤曦甫數歲俯仰無依氏
勤苦奉老翁教子成立邑令表其閭

庠生楊上林妻秦氏年二十八夫亡無子翁姑老竭誠奉
養翁病衣不解帶者三載閱十年始立繼嗣氏苦守教
育名列膠庠縣令梅學使劉給匾旌獎年七十八卒

緜獻儒妻張氏年二十一喪夫家奇窮鄰人勸其改適氏
甘荼苦矢志不移撫二子成家年六十三卒

陳緒妻李氏緒客死於楚氏年僅二十遣人取夫柩還葬
事姑盡孝撫二子成立守節五十年有司詳請旌表

武光啟妻王氏夫亡氏年二十五撫遺孤嚴慈並濟課諸
孫成名者衆元孫再見九十餘而終學使勵給匾旌之
段琬妾吳氏琬病藥罔效氏割股以進疾遂愈後生子甫
三歲琬病死氏引兒置女君鄭氏前不食月餘死督學
范匾旌其閭

靳永科妻牛氏夫亡孝事翁姑撫育幼子比子成立復亡
與媳共守沒齒無怨鄉黨稱雙節

邵文龍妻王氏年二十九夫亡遺孤五歲教育成立事老
姑侍奉不怠守節四十餘年有司優獎

生員裴士超妻秦氏夫亡無子繼姪爲嗣鞠育不異已出

事舅姑處娣姒循循有禮見孫而卒

武寧基妻李氏家貧克盡婦道夫不任事藉氏十指爲生活翁以寧基愚俾爲僧勸氏改適氏聞以履授寧基曰若不復著此履矣潛縊而死聞者莫不哀其志節

靳王前妻李氏夫亡家貧一女相依氏甘心笄獨孝姑撫女不變其志

常煜妻李氏年二十四煜遠遊不歸氏奉姑嫜撫弱子惟憑織衽艱辛萬狀姑亡哭泣遂盲其目苦守五十餘年夫竟不歸而死邑人公舉請旌

貞女秦氏大陽鎮人許配武廷詔年十六未婚而廷詔死

女辭父母奔喪成服奉事翁姑克行婦道公舉請旌

馮翠信妻李氏丁僻村人夫死氏年十七忍死生遺腹子撫育成入苦節四十餘載有司旌獎

王元妻李氏周纂人歸元七載元客死於豫子甫三歲氏自度育子不若從夫遂投繯死

李繼仁母常氏繼仁七歲喪父氏年僅二十餘貧無依倚紡績灌園撫子成立仁亦孝謹克承母志公舉旌獎

庠生畢多福妻牛氏年二十四多福亡自矢必死家人守勸之啣哀營喪墓乞叔子爲嗣撫育成入年八十老節

彌堅學使劉旌其門史溧陽相國爲之序

袁瑾妻杜氏神山里人生一子一女年二十三瑾病篤謂曰袁氏四世單傳今止此一子再醮幸存袁一脉氏咬舌出血誓瑾卒氏奉侍白首姑訓子成立有勸其改適者截髮毀容自矢年六十九卒詳請旌表

生員程六韜繼妻趙氏年未三十六韜卒氏撫前子不啻所生紡績資生爲子婚娶守節三十年公舉請旌

王國璽妻李氏沙僻人年二十夫亡無嗣苦守養姑繼嗣承祧貞節三十餘年知縣蔣給匾旌之

生員張鐸妻李氏年二十夫故遺一子氏矢志守節奉翁姑以孝聞撫孤成室生孫年七十餘

增生崔偉峨妻程氏夫死親老子幼事姑生養死葬盡禮
訓子成立幾五十年卒邑人公舉

邵錫妻李氏年二十錫亡遺腹生子織衽自給教子成立
守節三十三年子孫有名庠序學使府縣匾旌

申發成妻師氏年二十五夫歿生子甫八月忍死養翁姑
育孤子三十餘年詳院給匾

生員龐嗣煜妻韓氏年二十六夫故撫遺子成立子死復
撫孫苦節五十餘年詳院待旌

生員張濼母連氏夫死子幼教育成名年登八十公舉待

旌

童生連慎濟妻王氏姑死夫痛母亡氏殮夫畢亦投繯自
盡年甫二十七一門三口三朝畢命聞者酸心公舉旌
表

申禹安母李氏性孝慈夫亡事姑盡道教三子撫婿姪胥
克成立年逾七十勁節著稱縣令吳給匾旌獎

張肇萬妻常氏年二十三夫亡子幼氏養莖舅姑撫育幼
子苦節四十餘年縣令蔣給匾旌獎

李永法妻郭氏年十九夫卒忍死守貞養親教子年登八
十公舉請表

邵綸音繼妻緱氏年未三十夫死撫前子己子如一教育

入學年六十六卒公舉給匾

李海妻烈婦范氏通義里人海遠出姑命往王元家討穀元誘閉之窰中調姦不從用磚擊斃復割其首女往尋母並害之事發奉文旌表王元抵罪

烈女張四姐魏庄東里人年十三母兄他往同院居人宋起生起意調姦四姐哭罵出室鄰婦勸入母兄歸人爲和解隱息四姐羞忿不釋乘母他出自縊死奉文旌表起生抵罪

烈女郭大則南張寨郭文忠女年十五往地摘瓜豆遇同里張保全在野誘女至穀地卽按欲強姦女不從保全

將鑱傷其頭頸去父覓負女歸越二日死奉文旌表保
全抵罪

明月妻趙氏十九歲而寡子在智妻亦趙氏二十三歲而
寡止一幼子姑媳同心矢志撫孤姑苦節六十餘載媳
亦守節四十年同年而卒

王欽妻李氏城西南里人年二十四夫亡奉侍翁姑撫育
幼子茹苦五十年年七十三卒

牛鑰妻閔氏米山西里人年二十三夫死遺子在襁褓氏
紡織延生撫養孤子成立年六十八卒給扁以旌

武生陳珣妻韓氏周纂人夫病割股啖夫夫歿紡績自給

守節撫孤未享大年而卒

生員常琰妻劉氏年二十七琰亡奉養翁姑撫育子女年及七旬縣令甘給匾獎勵

陳錫遠妻張氏周纂人夫死殯畢卽闔戶自經家人救得免氏以死自矢未數月嘔血死學使蔣旌其門

宋枋妻楊氏米山西里人年二十六枋故翁姑垂老遺孤七歲氏仰事俯育艱苦備嘗享年七十縣令甘給匾旌其門

袁蔭召妻姬氏詩村人年二十三夫死無子女氏兩次自縊家人救免勸其奉侍翁姑後姑死五日氏仍盡節死

靳養蒙妻王氏許庄人二十八歲夫亡遺子二歲族黨逼其改嫁氏嚴責之辛勤撫孤年六十三卒縣令吳給匾以旌

李萬錦妻姬氏裴泉里人年二十九夫故孝養老姑撫育二稚子皆名列庠序年六十六終學使德給匾旌揚

監生緱樹妻常氏二十九歲而孀苦節四十五載學使勵給匾旌獎

貢生緱朴妻閻氏年二十九夫亡苦節四十八年學使勵給匾以旌其女緱氏適馮涓十九歲而寡遺子未週矢志撫孤享年六十七學使夏給匾旌獎

劉珮妻陳氏年二十二珮卒子女俱無矢以身殉家人防衛不果立嗣子未幾復亡復立嗣撫育若已出教之入學守節三十五年歿

生員祁斯源妻張氏年二十四夫死無子守節堅貞翁姑爲立嗣後嗣子亦死氏悲痛抑鬱而卒

馮四達妻王氏義庄里人年二十九而寡守節撫子子昌婚娶復死媳郭氏年二十八亦守節撫孤王氏享年七十郭八十一而終

監生楊邦佐妻李氏南廂西里人年二十八夫死奉姑撫

子三十載年六旬學校公舉

田聰妻楊氏儒林坊人年二十一而寡撫養子孫年八十
四卒學使勵給匾旌表

張映奎妻郭氏中太里人夫亡自縊死儒學師曲立碑志
之

朱有文妻閔氏徘徊南里人年二十七夫死繼姪爲子撫
育訓導四十餘年貞節自守儒學師張爲立石

鄭文沼妻趙氏治平坊人年二十二而孀子女俱無氏清
操自勵五十四歲而亡

畢霽妻邵氏柳村里人年二十二夫歿翁姑年老忍死侍
奉繼姪爲嗣翁姑死喪盡禮年七十九卒縣令朱給

匾以旌

監生楊上楨妻張氏年二十七夫故遺孤五歲抱痛矢志撫孤入學年六十九卒

史子英妻楊氏釜山村人生員載言母子英雙瞽氏歸後無怨言年二十四英逝子方五歲氏上事翁姑下撫幼子胥盡其道年六十一卒

馮鼎衡妻張氏年二十四夫故矢志守節康熙二十四年縣令劉給匾旌表

張氏女伯方村人幼許配牛氏子女年十九而牛氏子亡女聞暗泣父母改字靳姓女誓曰願作牛氏鬼不爲靳

氏婦親迎有日盛服投繯而死牛氏翁姑是夜夢女至
其家

閆鉉妻李氏節義坊人年三十夫歿止遺一子甫四歲氏
矢志苦守育兒衍嗣年六十三卒

庠生陳天錫妻王氏唐安人年二十八夫歿氏甘貧守志
事孀姑撫二幼子俱入學校學使邵給匾旌獎壽八十
有二終

杜海吾妻郭氏劉庄里人年二十八夫亡苦節六十年年
九十而終

鞏碧妻宋氏李村東里人年二十七夫歿勤儉教子守節

四十四年年七十一卒

陳苾妻張氏米山鎮人年二十六夫亡無子事翁姑立嗣子勤儉持家享年七十有七學使勵給匾以旌

楊貢金妻張氏年二十七夫故翁姑老氏無子念死難塞責養葬二親苦節孤守年八十六卒

馮銳妻李氏年未三十夫歿撫育子女後子媳繼亡遺孫九歲鞠育成立年七十七卒姪女李氏適畢中式年二十九夫歿事翁姑撫幼子成立又姪女李氏適邵從起年二十二夫歿翁姑垂老子女形單後俱病故繼嗣承祧撫如己出嗣子年十四入泮而母已逝矣時相語曰

李氏之廬姪如其姑俱以節著焉

李爾顯妻劉氏年二十一夫歿撫繼子不啻所生守節三十八年年五十九卒

鄭君弼妻焦氏氏適鄭五載夫歿遺子甫二歲矢志事孀姑姑死投繯自盡縣令周給匾旌表

孫永祜妻馬氏年二十五祜歿于旅邸聞訃哀痛幾絕嫂氏維護以子嗣之氏始忍死養翁姑撫嗣子孝慈交盡學使蘇給匾旌獎

楊光顯妻焦氏年二十三顯故繼姑馮性嚴氏奉事誠敬脩至撫孤成立清操六十載年八十四卒

陳斌妻楊氏年二十餘夫故遺子二俱幼氏教育成立守節五十年壽踰八十縣令蔣給匾旌獎

明五典妻李氏草坊里人年二十夫故遺子未週氏以蠶桑爲命仰事翁姑俯育孤子年五十五歿學使景給匾旌表

王魯妻張氏二十五而寡撫子入泮年六十五卒又魯弟王朴妻張氏年二十三朴亡撫孤守節年六十一卒一門雙節鄉里稱之

生員陳景鐸妻焦氏年二十夫故子女俱無氏奉養翁姑

撫育繼子年七十三而卒

常曙楨妻王氏年二十九夫故撫育三子成立守節六十年老而彌勁

焦美祿妻李氏年二十九夫故遺一子年甫六歲矢志撫孤成立子復故遺妻張氏姑媳勤苦度日教育孤孫入泮學使蔣給匾旌表

尙永壽妻邵氏嫁甫五月而夫歿氏投繯獲救免繼嗣承祧撫如已出守身嚴密年五十四終

馮名世妻畢氏年二十九夫歿貞節自勵壽登八十六終縣令吳給匾旌揚

李子馨妻王氏年二十九夫亡遺子十歲氏撫育成入苦

高平縣志 卷之五
節四十五年七十四卒

邢璠妻楊氏年二十二夫亡苦節自矢六十五而終縣令
虔給匾旌獎

石瑄妻史氏南廂里人年二十二瑄亡奉翁姑撫孤子守
節五十七年壽八十六終學使呂給匾旌表

邵近仁妻趙氏年十九夫故遺腹生子氏事翁姑撫幼子
盡道縣令謝給匾旌獎年六十三終

武生朱聯舜妻畢氏年二十舜故子女俱無奉親孝謹撫
育繼子有方年五十一而亡

李美幹妻秦氏年二十二夫亡遺子三齡茹苦自甘養翁

姑撫孤子守節四十餘年年七十卒

申發貴妻邵氏年二十二貴亡遺二子俱幼氏矢志撫孤
享年六十五卒

馮永福妻張氏年三十夫亡遺子七歲氏苦志撫孤年踰
七十潔清自勵

李銘妻張氏年二十二銘亡無子氏投繯獲救免繼姪爲
嗣撫育辛勤苦節六十年學使蔣給匾旌表

庠生李美玉妻張氏年二十六夫亡遺子七歲氏上奉舅
姑下撫幼子年七十五卒縣令羅表其閭

孔文獻妻郭氏年十九夫亡遺子甫週孝養翁姑撫孤成

立縣令蔣給匾以旌壽登九十

田俊妻石氏年二十三夫亡遺二子俱幼家貧無倚翁姑
衰老氏茹苦侍奉撫二子成立年七十九卒

趙經妻張氏年二十二經亡遺二子俱在孩提家計蕭條
苦守撫孤長子復亡教育幼子成立縣令周給匾旌表
年八十四卒

李培寶妻邵氏南廂里人年二十四夫亡遺子二齡翁姑
多病氏扶持奉養送終盡禮撫子延嗣年五十四卒

楊銀妻粟氏年二十八夫死翁老子幼家貧如洗氏勤紡
織以供朝夕年五十九卒

王光燦妻郭氏年二十九夫亡遺子九歲苦節撫孤年踰八十

邵世亨妻張氏年二十夫故無子貧苦度日奉侍翁姑繼姪爲嗣教育遊庠至老潔清年登七十九卒

監生秦潤妻王氏年三十夫亡遺子甫週氏零丁孤苦守節育後子娶媳趙氏未幾亦亡遺二子俱幼趙氏亦苦守子成立王年八十一趙年七十姑媳雙節鄉黨稱之
賀忠顯妻郭氏年二十三夫故子甫三齡氏矢志撫育年七十六卒

李履忠妻張氏年二十九夫故遺子九歲氏奉翁姑盡孝

高平縣志 卷之二十三
撫幼子成立苦節五十餘年年踰八十卒

姬述誌妻崔氏年二十九夫亡氏守節撫孤年六十八卒
學使吳給匾旌表

增生趙建業妻楊氏年三十夫亡遺子穉弱零丁孤苦守
節撫孤年八十五卒

常珮妻王氏年二十九夫亡子方七歲氏上事翁姑下撫
幼子茹苦守貞年八十一學使吳給匾旌獎

呂應鐘妻張氏年二十九夫亡遺二子俱幼家貧親老氏
紡績以給事翁姑撫幼子年踰七十人稱美之

段文龍妻李氏王報村人年二十八夫亡遺子甫十月茹

苦四十餘年撫孤成立學師張給匾獎之年七十二卒
楊映璋妻秦氏年二十九夫歿事翁姑撫幼子守節四十
餘年年踰八十卒學使勵給匾獎之

鞏謹妻秦氏李村人年二十八夫亡遺二子俱幼氏立志
守節撫子成人長子娶張氏復故遺二子張年二十八
奉姑撫子姑媳俱守節四十餘年

孫蘭妻畢氏年二十八蘭歿貧苦撫孤紡績自給年六十
八卒

郭承玉妻孫氏年二十五夫故家無餘資遺二子俱幼氏
辛勤守節年五十二而卒

程懷信妻趙氏年二十四夫亡遺子方二歲氏上事垂白
之姑下撫襁褓之子守節五十餘年年八十一卒

畢多脩妻張氏伯方村人年十九夫亡遺子四歲家計維
艱氏苦守四十年太守佟給匾旌表

李財妻郭氏建寧里人年二十九夫故遺子幼弱氏事翁
姑撫幼子辛勤守節幾五十年所鄉地公舉

楊上體妻張氏年二十五夫故家貧氏矢守撫孤五十餘
年年七十六卒

賈惠麟妻袁氏年二十五夫故遺子甫週翁老家貧氏矢
志苦守年五十三卒

緱文燦妻趙氏年二十八夫亡遺子七歲苦節撫孤年六十九卒

郭洪基妻李氏年二十五夫亡遺腹生子家貧氏上事孀姑下撫穉子十指經營苦節四十餘年年六十九卒

張旂妻李氏年二十旂故遺子襁褓氏上事翁姑下撫幼子克盡其道守節五十餘年年踰七十人皆稱之

李培標妻璩氏寺庄東里人年二十五夫亡遺子從仁六歲氏守節撫孤年八十四歲卒培標弟培賢妻馮氏年三十三妾邵氏年二十八賢亡遺子秉義尙在襁褓氏等艱辛撫育二子成室從仁秉義復相繼亡仁妻張氏

年二十一義妻李氏年二十六止遺一子兩世五孀茹
苦守志張亡年六十二李亡年五十三

趙思聰妻田氏年十九夫歿請於舅氏立嗣撫愛如所生
苦志三十年年四十八卒

張啟聖妻邵氏年二十七夫亡遺子女幼弱孤貧無倚有
勸其改適者氏曰吾粗知大義豈肯以存亡易心撫育
子女拮据婚嫁年六十三卒

朱映卿妻楊氏年二十六夫故遺子八歲氏矢志守節撫
孤年五十二而卒

貢士郭承儀妻宋氏年二十七夫亡遺子二俱幼氏辛勤

教子守節四十二年年六十八卒

李銳妻李氏年二十七銳亡遺三子氏寒苦自持事翁姑撫孤子針指以資不足翁姑考終子復相繼俱逝竭力營喪葬老而苦節年七十七終

李鴻儒妻縵氏年二十五夫歿遺子未週氏苦節撫孤年五十七卒子士麟亦早亡妻張氏年二十九遺二子俱在孩提氏教育成立守志四十餘年年七十五克效姑節

郭銓妻張氏年二十四夫故遺一子家業蕭條苦節自勵年五十六卒子列成均

岳維淮妻車氏年二十一夫故遺腹生子家貧鍼指資生
奉老姑育幼子苦節盡道學使呂給匾旌獎年五十卒
李光榮妻王氏年二十九夫亡遺一子八歲氏撫養成立
娶妻生子夫婦復相繼逝遺孫士鈺娶張氏生一子二
歲鈺又亡二寡相依張氏紡績自勤以養王歿張亦隨
殞王年七十七張年五十餘

師錫藩妻王氏雙桂坊人年三十夫故遺子尙幼氏苦守
志節年七十八卒

生員邵煥荆妻申氏年二十九夫亡遺二子俱幼貧寒孤
苦氏矢志鞠育孀居三十五年年六十五卒縣令黃及

盛俱給匾獎之

庠生許汝研妻丁氏年十九夫故氏事翁姑盡孝侯夫弟成立繼姪爲嗣葬其夫畢一旦逝年止四十二

邵維雍妻陳氏東宅里人年二十夫故十指自給撫繼嗣如已出苦節逾四十年子食餼庠序

石灝妻李氏年二十灝故遺子二俱幼氏以撫孤自誓家貧饑寒不恤事姑孝謹撫二子成立歷三十七年如一日學使沈給匾以旌年六十六卒

生員郝廷鉉妻邵氏年十九夫故奉養孀姑撫育繼子家計蕭條備嘗艱苦年三十九亡

高平縣志卷之三
緜龍光妻張氏年二十四夫歿無嗣氏矢志守節事翁姑
盡婦道年四十七卒姪承嗣焉

邵貴珍妻馬氏永祿北里人年二十九夫歿於旅邸遺子
甫週家貧煢煢獨立撫育弱孤娶妻生子年七十卒

李璵妻袁氏年二十三璵亡遺腹生子氏撫育恩勤靡懈
苦守五十載子先亡哭之喪明年七十四卒

生員楊池妻郭氏年二十六池卒遺一子始孩家貧如洗
氏矢節撫孤年七十九卒

李淮妻崔氏柳村里人年二十四淮故遺二子二女氏紡
織助供朝夕苦志以成婚嫁年七十二卒子金鰲食廩

庠序

趙萬福妻王氏年三十夫故上無依倚下有孤子氏食貧茹苦撫子授室子又故媳改適撫二孤孫愈形艱苦年將七十垂老益窮

栗法妻馬氏年三十法亡遺子未週氏矢志堅守四十年如一日年七十八卒

王明德妻王氏年三十夫故遺兩子一女未幾長子及女復亡舅氏逼之改適氏剪髮自誓奉病姑撫弱子盡道孫曾入學年七十七卒

楊自起妻段氏寺庄東里人年三十夫故翁姑衰老二子

幼弱氏菽水盡孝育子成人年逾七十人欽貞節

閆慎公妻侯氏年二十七夫歿子君輔方二歲撫成婚娶
後君輔亦歿妻邢氏年三十守節撫子侯年七十二卒
邢年幾八十

常維翰妻趙氏招賢坊人年二十六夫亡翁姑垂老有女
無子且姑性最嚴氏委曲孝養立嗣承祧撫如已出守
節幾四十年鄉里欽之子名列成均

吳君佐妻邢氏魏庄西里人年二十四夫亡無子奉養翁
姑繼姪爲嗣教育成立年將六十鄉里公舉

牛宗祺妻畢氏詩午村人年二十四而寡遺二子俱幼紡

績延生教子成立年六十餘村隣敬其貞節

田思義妻安氏通義里人年二十七夫亡遺子二齡守節撫孤茹苦自甘子婚娶亦亡與媳賀氏撫幼孫拮据度日鄉里公舉

王德運妻張氏建寧鎮人年二十九夫亡弟德玉妻韓氏後亦雙亡遺子王楚氏撫養成人年踰六十許苦節彌貞

杜蕊妻王氏團池里人年二十三夫亡忍死奉翁姑撫養數月稚子成立婚娶生子未幾子亦亡與媳撫孤孫三十餘年鄉里公舉

李朝印妻秦氏儒林坊人年二十八夫亡奉事老姑撫育
幼子食貧茹苦年踰七十公舉志節

王臣妻車氏年二十一夫故遺子甫二歲家貧守志紡績
資生四十年如一日鄉里公舉

監生李安仁妾馬氏伯方村人年二十四夫死嫡亦亡獨
遺一女氏欲自盡族人爲立嗣氏撫養如己出子女婚
嫁守節三十餘年

田開文妻趙氏年二十四夫死奉孀姑喪葬盡禮教育二
子長得遊庠三十餘年冰操愈潔

畢有銀妻王氏柳村里人年二十八夫故翁年衰邁子在

襁褓家素貧氏養翁送死教子成立守節三十餘年鄉里公舉

康子暹妻張氏草方里人年二十五夫亡苦守堅節年踰八十老而彌健

田牧民妻武氏永祿村人年二十六夫故遺子甫週痛絕復蘇盡心撫子四十餘年人傳苦節

牛子霞妻范氏伯方村人年二十四夫故上有翁姑與祖子甫四歲養殮莫繼人勸其改適氏曰是禽獸也食貧艱苦事老撫幼三十餘年始終如一

李作賓妻璩氏寺庄人年二十五夫故遺子二歲氏自縊

救免軫念孤兒紡績自給垂四十年人欽其節

李而理妻牛氏米山北里人年二十七夫客歸死遺子二俱幼氏拮据葬夫事姑撫子四十餘年年踰七十

李德金妻明氏年二十八夫亡無子事翁姑脩極艱辛立繼嗣撫如己出四十餘年紡績自給

郭存義妻史氏王報村人年二十夫死遺子甫週欲從夫未遂茹苦侍翁姑撫幼子歷五十載節操凜然

李培英妻田氏年二十七夫故遺一子三女俱幼翁姑衰老氏奉養鞠育竭盡心力後子媳三女俱不永年痛子

憐孫老節彌苦

常景捷妻馮氏招賢坊人年二十九夫故子女襁褓誓志撫育奉侍翁姑養葬盡禮父母未殯貧苦之餘勉盡祖塋守節三十餘年鄉里公舉

李生福妻王氏年二十七夫故矢志奉姑遺腹生子仰事俯育克盡孝慈苦節三十餘年鄉里公舉

庠生牛宗仁妻劉氏三十而寡遺二子守節撫孤成立三十餘年宗黨欽之

邵從禧妻李氏年十九夫故欲身殉不飲食者三日念翁姑無依繼嗣未立嗣襁褓子悉心撫育事親盡婦道三十餘年人稱貞節

李國相妻鄭氏年二十八夫亡遺子六齡氏盡心撫育三十餘年鄉鄰共稱清節

王廷賓妻李氏年二十二夫故遺腹生子氏上奉翁姑下撫幼子幾三十年苦節自甘

李增盛妻吳氏王降里人年二十八夫故子甫六齡辛勤撫子苦節幾三十年子克成立

王雍妻李氏寺庄西里人夫歿氏年三十遺子六齡勉事病姑藥餌必親曉夜不怠姑歿積痛成癆教子義方人

傳節孝

生員邵錫仁妻靳氏年二十三夫故痛不欲生勉撫子女

脩歷艱難奉養翁姑朝夕盡禮守節幾三十年子克入
泮

宋悅妻賈氏米山里人年二十三悅故遺子甫二齡翁姑
年老氏孝慈兼至守節幾四十年學使吳給匾旌獎

孝女程蘇氏平頭里人父德行病篤醫藥罔效女因截左
手第五指煎與父服後夢神示得女項肉可全愈女又
割左項肉以進病果愈鄉里公舉奇孝

王滌妻田氏年十八夫故止遺一女忍死奉翁姑撫繼子
艱辛脩嘗幾四十年人稱苦節

王培昇妻郭氏年二十四夫亡翁姑垂白遺子三齡養生

送死寬育嚴教三十餘年學使曹給匾旌表

原大有妻暴氏年二十七夫歿無子氏約夫弟大豐生子
爲嗣既生弟婦難之氏亦不強復約次子又生仍難之
氏曰不以爾子嗣有死而已抽刀幾斷其喉遂立嗣爲
夫營墓刊石立碑預書合穴奉祀焉

馮泗宗妻畢氏年二十夫故無子繼姪爲嗣撫養不啻所
生潔清自守年踰八十縣令虔給匾褒獎

李宗禮妻王氏年二十夫亡子淳未週歲矢志撫孤未幾
舅亦卒家無餘資氏黽勉爲夫弟婚娶教子有方持家

整肅年五十卒

王士榮妻陳氏赤祥村人遺子甫週家貧舅姑老氏紡織
度日事親撫子苦節四十年年踰六十鄉里稱之

馮兆麟妻王氏年二十八夫亡子生始彌月氏事翁姑撫
幼子孝慈交至年踰七十霜節不渝

袁大財妻秦氏詩村人年二十夫亡遺子三齡氏守節事
親撫孤成立子亡復撫幼孫年踰七十公舉待旌

秦僻儉妻李氏建寧里人年二十一夫故撫遺子二成婚
次子早亡媳亦效姑守節李氏年踰七十矣

丁詔妻李氏結襦甫二載夫故無子氏奉事翁姑二十餘
年不怠後繼嗣鞠育如已出年踰六十堅貞之至老而

彌篤

常沛蒼繼妻趙氏招賢坊人年二十夫亡遺前子方五歲氏立志守節奉親撫孤子得遊庠氏年踰七十

生員李子建妻趙氏年十九夫歿撫繼子不啻己出守節五十年年踰七十

田濟民妻賈氏年二十夫故無子父母勸其改適氏焚香樞前刺指出血誓伯氏以子繼嗣教育得遊武庠苦節四十餘年年踰六十

段如傳妻李氏年二十七夫亡子甫七歲苦無依倚悲傷

撫子雙目失明子迄成立氏年踰七十矣

趙子敬妻張氏年二十四夫亡遺子二俱幼家計艱難茹苦撫孤年將七十節老愈堅

暴溫惠妻王氏年三十二夫故遺子始週翁老姑逝家貧誓守教子成立苦節近四十年

崔元泰妻張氏野川西里人年二十八夫故子八歲家貧無倚氏矢志守節茹苦三十五年年踰六十

楊佐財妻王氏年二十九喪夫子生甫三月氏事老姑盡孝撫孤子成立守節三十載隣里欽之

畢中道妻王氏年二十四夫故遺子甫四歲家貧苦氏矢志守節撫子成立年近七旬勤儉以老

王大雷妻宋氏永祿里人年十八夫故遺子甫週氏矢欲從夫家人勸免事翁姑盡道撫孤子成立苦守三十年隣里欽頌

郭浹妻姬氏年十八適浹二十一夫歿生子尙在襁褓氏奉孀姑盡道撫孤子成立守節四十餘年年逾六十卒郭治田妻郭氏石嘴頭人年二十七而寡遺子三歲父欲奪其志氏曰姑老子幼依倚何人矢志苦守四十餘年年登七十

優生趙爾明妻申氏年二十三夫沒子甫三歲矢志撫成子復不祿氏甘守寡獨四十餘年年七十

田實重妻趙氏徘徊里人年二十六夫亡遺子襁褓氏撫
成婚娶子復亡媳秦氏年二十四繼姪爲嗣趙氏守節
四十九年秦氏亦守三十年又其弟實好妻李氏年二
十七而寡子甫三闕月撫養成婚子亦沒媳郭氏年二
十一遺子未週氏守節撫育李氏守四十七年郭氏亦
三十二載一門四節里黨稱奇

張鐸繼妻韓氏年二十夫故矢志守節事翁姑盡孝撫前
子成立三十年人無間言

李中和妻安氏年二十九夫歿守節撫孤四十餘年縣令
沈褒美

王怵妻袁氏年二十九夫故于甫週歲翁衰老氏立志撫孤事親嫂氏遺子女並撫之年將六十老節彌健

馮學禮妻李氏年二十九夫故遺子二俱幼家素貧氏苦守撫孤年將七十子克成立

張士魁妻李氏康營村人年二十四夫亡生子甫五閱月氏忍死奉翁姑撫弱子荼節自甘三十餘年年將六十王金璽妻張氏柏枝庄人年十九夫亡遺腹生子家計寒薄茹苦撫育爲子婚娶復亡年逾七十煢煢獨守

楊聲溥妻郭氏年十九子歸三月而寡氏守節不渝五十餘年繼子攀桂娶郭氏桂死氏亦守節焉

陳源繼妻袁氏年二十二夫故遺前子甫三歲氏撫如已
出苦節四十餘年年逾六十子復故惟媳存焉

畢得紳妻唐氏詩午村人年十九夫故遺子襁褓氏矢志
撫育守節六十餘年年八十一又其孫中彬妻李氏年
二十三夫歿撫遺子事翁姑年逾六十人稱賢孝

張鳳乾妻常氏年二十七夫亡遺子九齡氏苦志撫孤幾
三十年子復故撫孤孫艱難拮据年逾七十鄉里公舉
郭錙妻魏氏年二十一夫故遺腹生子氏苦節撫孤五十
餘年年逾七十

郭伏龍妻申氏年二十九夫歿氏上奉垂白翁姑下撫四

歲孤子考終成立年逾五十鄉黨重之

王佩妻張氏陳庄里人年二十四佩亡遺子五齡氏矢志撫成中年子復亡氏始終不變其節年逾七十身老而健

王若陶妻王氏原村里人年二十三夫亡遺子襁褓矢志守節年逾七十子復亡氏霜操獨守

趙魯瞻妻李氏年二十九夫故姑老子幼氏矢志守節淡薄自甘年逾六十子克成立

賈致中妻劉氏年二十夫故氏孝養翁姑矢志守節撫繼子如已出家貧勤女紅自給孀居五十載年逾七十閭

里欽之

賈淇妻祁氏年二十七而寡事親盡孝教子成立學使呂給匾以旌年幾七十子宗桂廩生

邊關妻李氏年二十八夫故貧難度日有勸其改適者氏斥之遺二子教育成人守節三十載年幾六十

楊榮妻崔氏寺庄人年三十二夫故遺子三氏痛絕復蘇事翁姑撫孤子家貧紡績以給年五十餘人稱苦節
孫發起妻王氏年三十一夫故子幼家貧零丁孤寡撫育成立年逾五十鄉地舉之

武生尙玉珠妻李氏年三十三夫亡遺子二氏勵志撫孤

年逾六十克守志節

景德妻王氏年三十一夫故遺三子氏立志守節撫子成立年幾八十稱貞婦焉

靳禮妻李氏團池南里人年二十三夫亡閱五月遺腹生子氏殷勤教養苦節四十五年將七十子克成立

趙繼周妻常氏年二十二夫亡子增甫七月氏孝事繼姑撫弱息成立中年增復亡督諸孫舉四世喪支持門戶四十餘年內外靜潔鄉里稱之

趙修妾林氏修納自揚州偕至家生子皆殤年二十八修亡氏求族子爲嗣既婚娶復死又乞遠族子立嗣族有

無賴欺凌百端氏介然不易其操晚益貧窶卒無怨言
按士君子讀詩書明義理遇忠孝節義之事莫不慨
然思效之女婦生於閨闈非巨家大族亦奚知禮著
內則之篇詩咏柏舟之節故甘心齏白屬饜糟糠守
不二之操盡未亡之職歌興寡鵠德嬾丸熊鄉曲窮
檐尤爲難矣舊志所載暨鄉地所舉胥綜錄焉孝女
烈婦統繫守貞不另條列年例或有未符而養親撫
孤含辛白首者亦附識之有善必彰所以風也

高平縣志 卷之十六

祥異

和氣致祥乖氣致戾天人感應之理自古不誣歷代史冊必謹書之所以示鑒戒勸修德也夫珠聯璧合澤馬山車帝王嘉瑞寔有明徵若祥桑雉雒之異亦所不諱曾子固曰災沴之來雖治世不能使之無而能爲之脩一言而星退舍德可勝妖詎不信歟一邑之中亦有徵警迺休弭變誠視乎人志乘不容不詳也誌祥異

周敬王四十三年丹水壅不流 元王六年丹水三日絕

不流 威烈王五年丹水出反擊

擊一作潔
竹書紀年

漢永康元年秋八月己亥泣氏縣地裂 舊志按漢紀永

康元年八月十五日夜泣氏地裂數十丈卽今王報寺
庄白方等村是也省志又云考五行志作五月丙午上
黨泣氏地各裂

晉太康元年春三月霜雹傷桑麥 桑方吐葉麥正揚旂
農夫相與慶於野以爲有年之兆未幾霜隕雨雹交作
桑麥爲之盡枯

永寧元年冬十月乙亥風雹折木 雹大如鷄卵自晝
至夜平地幾三尺樹木盡折

元魏太平真君六年二月丙辛上黨觀連理樹於泣氏 魏書

周武帝建德六年高平獲赤雀

省志

隋文帝開皇元年二月辛巳高平獲赤雀

隋書

唐肅宗乾元二年秋不雨 舊志自夏六月不雨至秋九

月禾黍一空有司發倉廩以賑貸仍告糴于懷孟

後周世宗顯德元年春三月丙午有鵲巢於縣郭之南川

舊志鵲初巢於柏樹之巔有鷓鴣鳥爲害乃移巢于郭南

平地每巢爲雛者七八

宋真宗大中祥符元年秋七月甲子五龍躍於丹水 舊

志時方大饑民艱于食有司禱雨不應至是五龍見于

丹河之上光映數里雨澤隨降歲豐稔斗米僅數十錢

金熙宗天眷三年夏五月庚申地震驚死者數百人

皇統三年春三月戊子五龍復見於丹水 歲豐稔如

祥符 八月嘉禾生

元至元二十二年夏大旱歷三月空無片雲盜賊蜂起

二十九年大饑 舊志時霖雨冰雹相兼夏麥秋禾盡

廢百里皆赤地死者枕籍流離載道呻吟之聲至不忍

聞

成宗大德七年八月朔丁亥地震 舊志時夜將半大

風起湏臾地震如搖櫓狀官舍民廬壞者無算

九月火起于民家延及衙舍說者謂烏鴉爲害

十一年夏四月庚戌地震 舊志先是上都地震壞及宮寢至是高平地亦震自午及申如舟將覆凡三日止明永樂十二年秋八月朔甲子靈雨害稼

景泰元年秋七月戊午隕霜殺穀 舊志米山鎮之東幾二十里

天順六年歲大饑斗粟千錢民易子而食 舊志餓殍盈野有司收而埋之爲萬人坑相傳在城北里

成化十八年夏六月丁未大水 舊志城近西山時有水患至是民有見角而羊者鬪於金峯之麓水忽暴漲而下城郭幾爲蕩沒

二十年大饑民多疫死生者至相食詔遣戶部郎中移
河南山東粟萬石賑恤仍免山西合省田租之半

弘治元年秋八月壬子大風折木 舊志或折其枝或
拔其根雖喬棟亦然

八年蝗 舊志時知縣楊子器甫下車釀幣祀之蝗乃
息

十二年夏旱秋復澇 舊志旱時知縣楊子器禱於淵
靈泉得雨

正德八年夏五月青 舊志黑青爲災夜入人家或嘯
於梁或坐於榻狀如青衣四境驚惶兒童輒懼死凡五

晝夜乃滅

十三年秋大水

舊志丹河漲溢臨丹河村舍數千間

多損壞

嘉靖二年春三月風

舊志大風飛沙三日麥苗被壓

死

五年冬十月己未地震

舊志山陵皆動百姓驚恐相

與抱持伏於野不敢入室

十二年春三月癸丑雨雹

省志

空倉嶺有大如轆軸者

冬十月乙亥星隕如雨

舊志初昏時恆星不見抵夜

星隕如雨住行失次南北交流未幾河南巨盜師尙召

兵起

三十四年民亂嫁娶 舊志時相傳採女童爲仙藥民間驚惶亂婚嫁

三十七年夏四月羊頭山產靈芝入貢

舊州志

隆慶二年大有年 舊志斗米錢三十文

萬曆二年秋八月辛巳獲玉兔一 舊志時知縣李公楨清自人以爲所感

十年春二月換馬鎮北山裂 山鳴凡三日裂數丈廣尺餘裂時震動數十里

十一年春二月乙卯民吳守倉妻一產三男

十三年春三月丁亥地震 三月三日也自午至夜地
大震者三

夏五月壬寅雨雹 大者如杵自郭至南鄉二十里間
禾黍盡壞

十四年春不雨至夏六月大旱民剝樹皮以食疫病大

興死者枕籍詔發帑賑之

舊志
省志

十五年復大旱死亡如故

舊州志

夏三月丙辰夜雨雹 舊志時縣令楊應中禱雨於靈

貺王得雨不報祀乃有白雲起自西北冰雹隨降壞民

廬舍

二十四年冬十二月獲玉兔二

舊州志

二十七年秋七月壬辰雨雹八月庚戌隕霜歲大饑

二十八年夏六月雨雹如拳積盈尺不消麥熟盡壞

府志

三十年夏五月店頭村地裂 河水暴漲村幾漂沒村
後平地忽裂大穴水入其中已復合如故

三十一年秋七月唐安里煤窰雷震火光上騰高二丈
餘周圍廣百步下熱雨尋復入窰中人不致近謂有火
龍潛焉

三十二年秋唐安鎮暴雨水溢壞民居有言見鱗而角
者伏水內村民恐相與祭之已復河水如故

三十五年春三月有星自東流於西北去地僅二丈許
經米山及縣城形如帚有火光

夏四月星隕於東平村墜地有聲入深數十尺口窄而
中甚寬

夏五月濟瀆池水濁尋復清 靈泉素清至是忽濁如
赤鄉人驚異祀以牲醴乃復清

閏六月冷氣如冬長河有霜

四十二年秋九月地震有聲如雷

四十五年秋九月彗星見至冬十一月止 初東北有
白氣迷漫數夜至是彗星見長三丈許白氣時在四面

旋繞闌三月方不見

四十六年秋九月雨雪落樹皆如冰塊折傷無算凜冽如冬

冬十二月日暈耳凡數見

四十八年夏五月雨雹大如杵屋盡碎

崇禎六年夏大疫冬無雪

冬十月鷓鴣至 體似雌雉鼠足無後趾岐尾不能樹棲性慙急群飛集若蝟毛北方沙漠產也

十三年旱蝗大饑人相食

國朝順治三年秋七月大水唐安村河水橫決倍甚男婦

有溺死

六年春正月雨雪大雷有星自西北墜於地光芒數丈
夏四月地裂

八年夏六月地震

十三年夏大旱無麥斗米一千五百文人民饑

康熙十九年八月三日雨雹大者如拳小者如卵西南
鄉東宅回山唐安馮村馬村六里計十五村落禾稼俱
傷

三十年夏六月旱二十日至二十五日飛蝗蔽日自南
而北落地積五寸田禾一空起自東南劉庄雙井李門

至西北高良柳村通義三十五里被災獨甚

三十四年夏四月六日地震大原平汾潞澤同日震旬日凡數次城堞屋宇多傾壞奉

旨發帑散賑又給貧民修葺銀兩並發帑修築城垣官廨學宮

三十八年閏七月五日戌時大風陡起冰雹隨至魏庄東等村十八里禾稼傷損八九

四十六年長平驛民人李兆槃妻賈氏一產三男

雍正七年夏五月十七日雷雨交作內帶冰雹秋禾未

損是歲大稔

乾隆二年秋七月二十六日雨雹韓村高良二里被災
民所借倉糧 題請緩至次年免息還倉

九月初七日未時地震

五年閏六月十八日雨雹柳村掘山至十里舖秋禾微
傷

七年八月三日雨雹長平德義管寨掘山等村秋稼微
傷

九年夏六月十七日雨雹府下里府底村秋稼微傷

十年秋七月六日雨雹換馬等四村庄秋稼微傷

十二年夏六月十一日雨雹李村西等二十九村庄秋

稼傷損

十二年秋醴泉出石末 泫志拾遺石末村西二里許
河隈有水一綫涓涓入於河次年春稍大色清味甘飲
之者病皆愈土人卽泉爲沼設香案置簿來者如市縣
令蔣受吏言謂其惑衆禁之今水猶昔過者弗問矣
十三年夏六月雨雹趙庄等四村未報災

十四年石門村民人郭雙居等十數人往北山斫煤窰
內忽暴水湧出將窰溢漫衆逃出惟雙枯在內以爲必
淹斃隨覓工絞水出屍迨六日忽聞有救命聲又一日
水盡見雙居未死稍甦問之云有一老翁與伊豆腐食

故不甚飢後竟無恙

十六年閏五月朔大雨山水驟發東關等五村冲没房舍人口 題請賑恤給過銀一百三十二兩零開倉散給籽種

十八年自七月十四日雨起至十月初五日止秋稼泥瀾年穀雖豐傷減二分諸河發水道路泥淖行人苦甚二十年五月十七日大風發屋拔木翠屏山二仙廟中鐵香爐吹起與殿簷齊盤旋數四而下碎之是日龍尾丹水姬萬等村大雨雹有爲雹擊死者

二十二年二月初二日丁壁村時近黃昏忽起狂風一

陣見有二火毬大如斗其色紅黃綠相兼從北滾滾而來向南徐徐而去就地行走久視漸遠不見歸落

二十二年七月下沙地陷壞人室廬數十所

七月二十七日大風傷稼落粒滿地

二十四年秋蚜蝻傷稼是年四五月旱六七月澇繼之以蟲秋成薄甚穀價騰踊民食維艱

二十六年六月初七日更餘火龍見於石末初忽聞若放起火之聲有光自東而西橫亘於天約二三丈視之如天裂然兩頭有黑雲其身如一字之形其首頗大俄而其身蜿蜒起伏其尾搖動有欲墜之勢人初見疑爲

流星久之乃覺是龍少選仍退而東首尾入雲中遂不見

二十八年十月初七日小雨一更時忽有霹靂起空中人皆驚懼以爲起龍是年雨多而不甚聞雷至冬乃有此大雷亦可異也

三十三年夏有域一名射工不知其所自來喜見燈火人中其毒則死或有掩得之者傳觀以爲異

三十六年九月唐安里武生張純信糾衆掏挖廢煤窰次年二月至窰底工人秦之英甫入覺火氣薰蒸急出鬚髮已燒毀有陳賈祉不信復入見火光自內出烟火

加騰直上衝天移時方熄衆將賈社救出肌肉皆焦數日而死然自此每日出煤並無妨碍土人謂卽萬曆二十一年火龍潛藏之窟今火龍已上升也

三十八年十二月寺庄鎮民張萬全妻李氏一產三男知縣傅德宜捐俸爲覓乳哺又償絹衣三領彌月後親詣驗視俱生全 國家生齒之瑞於此可見因命名曰瑞泰瑞平瑞祥特爲轉達

上聞

按王子年拾遺記炎帝教民耒耜百穀滋阜神芝發其色靈苗擢佳穎朱草蔓於階卿雲蕩於巖今羊頭

山下泉北有畦卽神農得嘉穀處也瑞莫大於豐年
高平穀種之美甲於他邑斯民苟力農務本安於畎
畝衣食毋滋戾氣以順天和將見十雨五風頻書天
有察微洞極占驗之術亦可以不講矣太古荒畧之
紀邈乎悠哉

高平縣志 卷之十七

雜志

志以紀事比類屬辭曷言乎雜雜之云者類無可附辭不可刪嵒怪亦錄叢談與存或得之簡編或傳之父老存而不論是亦志之職也矧其中亦有典核足叅者易曰雜物撰德辨是與非從其雜也而雜志之云爾

高平范氏帝堯裔孫劉氏累之後伊祁姓自虞以上爲陶唐氏夏爲御龍氏商爲豕韋氏周爲唐杜氏周衰奔晉爲范氏 按通志有姓氏一則高平祇一姓無可附入用載雜志之首

正之集元 卷之十一
夾漈鄭漁仲云天之所覆者廣而華夏之所占者牛女下
十二國耳牛女在東南故釋氏以華夏爲南瞻部州其
二十八宿所管者多十二國之分野隨其所隸耳趙韓
王嘗有疏云五星二十八宿在中國而不在四夷斯言
至矣 癸辛雜志

漢書地理志分郡國以配諸次其地或多或少徒以相傳
爲說其源不可得聞於其分野或有妖祥而爲占者多
得其效蓋古之聖哲有以度知非後人所能測也 又

漢魏諸儒辰次度各用當時歷數與歲差遷徙亦非天
象度數之正惟唐一行下觀山河兩戒上考雲漢之終

始斗杓之內外以定分星之次更以七宿之中分四象
中位自上元之首以度數紀之而著其分野最得天象
之正 節田氏說

明潞安栗應麟星野論曰余初第時見廖洞野學士云天
文不知是無頭腦學問且取步天歌讀之因考諸家果
無過於丹元子者覽圖誦歌得心應目每於秋夜登臺
仰觀內自太微外及列宿經緯周垣若珠聯碁布可數
而知鄭漁仲謂素秋無月碧天如水一天星斗盡在胸
中如視爲荒忽而不究心非達天者矣

周商高算經昔者周公問於商高曰竊聞乎夫子善數也

請問古者庖犧立周天歷度夫天不可階而升地不可
尺寸而度請問數安從出商高曰數之法出於圓方圓
出於方方出於矩矩出於九九八十一故折矩以爲句
廣三股脩四徑隅五既方之外半其一矩環而其盤得
成三四五兩矩其長二十有五是謂積矩故禹之所以
治天下者此數之所以生也周公曰大哉言數請問用
矩之道商高曰平矩以正繩偃矩以望高覆矩以測深
卧矩以知遠環矩以爲圓合矩以爲方方屬地圓屬天
天圓地方方數爲典以方出圓筮以寫天天青黑地黃
赤天數之爲筮也青黑爲表丹黃爲裏以象天地之位

是故知地者智知天者聖聖出於句句出於矩夫矩之
以數其裁斷萬物惟所爲耳周公曰善哉

注云商蓋在
今高平商容

老子之師起太行
固知商高七姓也

日知錄宣公十五年晉滅潞氏狄十六年滅甲氏及吁留
成公十一年伐廡咎如春秋時高平淪於戎狄爲辰米
國從潞子杖馬箠盜晉邊晉次第滅之

辰辰放氏後春秋赤翟今辰堰村米米子國赤翟後今米
山 四州文獻

伯封夏天官夔之後羿滅伯封金仁山曰君臣爭諸侯也
後爲吉甫邑在今高平

董封趙董安于死簡子追封在高平非聞喜董澤之陂
范士句封長平句邑范與和大夫爭田卽此

晉伐原以原公歸高平原村有原公水晉伐荀以賜原氏
先穀封曰原穀

肥子遷昔陽荀吳假道於虞遂入昔陽昔陽人遷長平
公羊晉人敗狄於高粱在高平非臨汾高粱故城

逸書趙獻子城泫氏竹書梁惠王九年晉取泫氏有泫谷

水

以上俱四州文獻
所載存以待考

史記周威烈王七年晉烈公元年趙獻子城泫氏顯王十

七年晉取泫氏獲澤

慎靚王六年鄭侯使韓辰歸晉陽及向二月城陽向更名陽爲河雍向爲高平

唐太宗時李勣攻盖牟城拔之得戸二萬糧十萬以其地爲盖州盖州之名所自始

戰國策白起率數萬之師攻強趙北坑馬服誅屠四十餘萬之衆流血成川沸聲若雷使秦成帝業自是之後趙楚懾服不敢攻秦者白起之勢也

畢氏按長平先隸魏後隸韓入於趙併於秦秦有長平在谷口以旌武功望夷宮在長平卒爲二世絀弑之所以一人殉四十五萬之衆天道盖可畏哉

春秋左傳僖公九年齊侯以諸侯之師伐晉及高粱而還
畢氏曰高平有高粱上梁沁有下梁由下梁戰高粱由
高粱滅潞距潞百里西師之次也

神農因上黨嘉禾八穗乃作穗書

玉海

神農之興百穀滋阜羊頭黍爲律上黨禾爲書是以丹梁
似蓋香露成池因有秦龍之圃時丹雀啣九穗禾其墜
地者帝拾之以植於田食者老而不死赤松子其著也
稻梁麥菽粒我蒸民遂爲先代飲食之人

四州文獻

倉頡作字四目靈光或以爲黃帝之臣路史以爲史皇神

農之後今羊頭山神農始種五穀處西建倉頡廟乃知

倉頡君天下者非臣也

北周以羊頭山黍依漢律歷志累黍造尺以定黃鐘

河南程氏曰古法律管當實千二百粒黍羊頭山不相應則將數等驗之看如何大小者方應其數然後爲正胡先生定樂取羊頭山黍用三等篩子篩之取中等者特未定也

羊頭山界高平長子間上有神農廟所謂前簷滴高平後簷滴長子是也

古人制尺以調律累黍以定尺隨代變易訖無定準漢志云律本於黃鐘之長以羊頭山秬黍中者一黍之廣度

高平縣志 卷之十一
之九十黍爲黃鐘之長蓋一黍約一分九十黍九寸律也此必上古以來有所傳授故歷代因之以定律尺之

度

明王庭相律尺說

空倉秦以給趙米山趙以給秦夫唱籌量沙敵猶疑之曾謂聚米爲山十數里層巒複嶺假以走敵安可欺秦趙之牧豎哉北岳祀恒山以其神爲庚桑注西空倉嶺北廟祀空倉神是乃庚桑之轉音也

省志記云潞澤之交橫亘一山起丹朱嶺至馬鞍壑有古長城一道歲久傾頽遺址尙存登高望之宛然聯絡中有營壘土人謂交兵時築

邑有蚘蚘嶺陵川有蚘蚘廟攷蚘蚘食苗蟲也唐書五行志開元二十二年八月榆關蚘蚘蟲害稼入平州界有群雀來食之一日而盡二十六年蚘蚘蟲害稼群雀來食之廣德元年秋蚘蚘蟲害稼關中尤甚斗米千錢長慶四年絳州蚘蚘蟲害稼太和元年秋河東同虢等州蚘蚘蟲害稼五代史梁開平元年八月丁卯同州蚘蚘蟲生宋史太平興國五年秋北海蚘蚘生齊民要術載汜勝之術曰牽馬令就穀堆食數口以馬踐過爲種無蚘蚘蟲也張有復古編作子方義同嶺名蚘蚘昔應有廟八蜡索饗昆蟲此其遺意歟

丹水自高平縣來至河內丹谷口有大丹河小丹河從石

斗門分流大丹自新鄉入衛小丹至岔河尖入衛長一

百九十二里

河防志

丹河南注西下中間分散有十八道小溝渠民用灌溉至

劉村入沁水首尾三十里

紀程

神芝讚曰魏青龍元年五月庚辰神芝生於長平之昔陽

其色紫丹其質光輝高八尺六寸五分散爲三十六莖

枝幹連屬有似珊瑚之榮詔御府匱而藏之具畫其形

長平箭頭銅爲之知古兵器皆銅東觀餘論銅戈辨中論

冶銅爲兵之法獨詳以銅則燥濕風雨所不能變中雜

以鉛較利於鐵李長吉長平箭頭歌所謂淒淒古血生
銅花也至後世易以鐵冶銅之法亡矣

府志

長平之坑戈頭箭鏃耕人往往得之戈頭不得見見箭鏃
數枚形三脊皆銅爲之土花猶瀆古血夫兵器皆利用
鉄此率用銅未識何義及閱黃長睿銅戈辨甚詳云昔
始皇二十六年收天下兵聚之咸陽銷以爲鐘鏃金人
十二重各千石又春秋傳僖公十八年鄭伯朝楚楚子
賜之金旣而悔之盟曰毋以鑄兵遂以鑄三鐘夫五金
皆金也秦人之金人及古鐘皆用銅可知矣是古者以
銅爲兵誠然又云銅爲物至精不爲燥濕寒暑變其節

不爲風雨暴露改其形確乎有常爲君子之行是以昔人尙之由長睿之說其長平箭鏃多銅奚足怪余隨家大人官澤高平屬邑也因得見長平箭頭又見東觀餘論之說並及之

修亭朱會長平箭頭說

按董安于之治晉陽寓矢於麇寓銅於柱被圍之日卒得其用銅爲兵器從古然矣

宋治平三年明道程先生來令晉城建鄉校七十二處社學數十所行縣時親爲兒童正句讀春風靄然所在向化迄今人猶嚮往之於高平之辰堰郃庄石村勾要建

寧前里建寧後里魏庄徘徊趙庄米山吳庄裴泉陳村

李門馬村東宅周纂唐安古寨方伯

有康熙七年重修碑記

釜山

原村小城等里有文廟二十三處皆無碑碣可稽卽得

一二重修碑記皆明季及國朝所立亦不言及創始

年月要皆先生鄉校之遺址多歷年所日就荒圯今訪

之存者無幾餘皆蔓草荒烟地且不可考况屋舍耶恐

此後更多隳廢遂悉記其處以待考古者

冬秀亭詩話

遼世宗以自愛黃驢九龍十二稻玉帶報北漢王劉旻聘

後旻敗於高平獨乘黃驢自雕窠嶺間道馳去旻歸爲

黃驢治廐飾以金銀食以三品料號自在將軍

遼史

綏寇紀畧載崇禎四年五月潞安猗民作亂於壺關高平

陵川是月二十七日邊盜王嘉印從高平之長平取山
徑至沁水坪上村六年十二月賊西遁聚於高平長子
之間

民壯之設介在軍民間最爲得用在宋謂之白芳子明延
綏盧祥初議本爲寔邊邊兵有三在本鎮爲本兵調自
他鎮爲客兵原點民壯爲土兵土兵寓於農彷彿周官
伍兩族閭軍師之遺意今天下府州縣設民壯護城池
捍牧圉誠加意訓練之俾材藝精壯名與寔符民不擾
而緩急有賴誠要務也

風俗通陳龜遷京兆尹民有病則給醫藥常使戶曹巡行

省志載元賈魯書文廟鼓樓二記魯書取裁于晉而氣骨
蒼穩絕去近世佻巧之態昔人謂元人書法有復古之
功豈不信然惜其碑爲風雨剝蝕日就湮滅好古者不
能不爲動念

明弘治六年癸丑邑人進士郭芝撰高平毛令忠重修長
平驛碑記曰驛舍皆元左丞賈魯故第材魯前治河以
功拜左丞當時爲之語曰賈魯治黃河恩多怨亦多萬
年千載後恩在怨消磨賈之功亦偉矣賈子亡其名其
曰賈五舍者太祖皇帝天兵南下集鄉兵拒敵死之家
屬悉遭俘戮建驛之日撤其故第之材充焉故驛舍之

壯麗者皆賈第材也賈子雖以不服死在于所事則忠且義矣而故第驛舍矣人知賈第之侈而不知賈之功可以居人知賈第之毀而不知賈子之忠義可以不朽晉王殿下亦曰千載應傳賈魯名想當時亦有爲殿下言及此者賈之功固難能而其子之忠義亦未易得其事皆不傳者以其敗耳嗚呼可以成敗論人物哉茲因驛舍之復特表出之以爲來者告 按魯有子積是否五舍不可攷州省志皆作賈五會乃魯子明時靖難兵南下五會集鄉兵抗拒因致全家俘戮謂其忠于建文矣夫魯有大功爲元名臣其子拒明應得盡節于所事

若云靖難兵下而死殊屬少據今見高平舊碑幸其跡具在而五會者五舍之譌也記云亡其名兵燹之餘自應漸滅而殘碑斷碣尙覺昭然故辨正之

府志

邢姬姓周公之胤也爲魯附庸狄入邢齊人救之邢遷夷儀三師城邢美桓公之志義也後衛侯燬滅邢春秋以滅同姓之親故生而書名其後子孫世以爲國姓陵夷至于列國子孫散處莫可究詰今按邑志漢有名晏安者不知何許人始爲高平令嗣是而有道業有顯有文光皆相繼爲令迨文光歿于官而子孫遂占籍于邑之邢村晉有名元卿者以功進爵太尉而邑志中又有曰

安曰文顯曰延之曰元中曰仲慶俱爲太守曰受并州
司馬曰尹定州刺史俱先後出處莫可考証而衣冠世
躋屢登樞要殆棨戟之門世德之彥乎入明朝又有曰
校曰璉曰憲曰國庶俱以鄉舉曰永淳曰天叙曰國熙
俱以貢升識者謂其世德未艾云

舊志

唐有宗室子寓居于高平自宋有名大節者以長厚聞節
之子旦始躋顯仕旦生異舉進士異長子林亦舉進士
次子森年十八澤州發解第一爲萊州文學森長子曼
以能賦稱金大德二年登第次子晏舉皇統六年進士

歷翰林學士承旨禮部尚書卒謚文簡曼長子伯疇善

騎射次中立昌明二年登第歷鄭平安平秀谷三縣令
考績爲天下最晏長子仲畧大定十九年登進士第官
左都曹未幾以父衰病乞歸侍特授澤州刺史以便祿
養諧辭有曰父常持節覃懷子復分符濩澤一門之寵
時人榮之而今不可作矣

舊志

郭氏汾陽之後相傳有郭恩者自太原徙居高平壽九十
餘卒墓于邑之李村有群鴉數十來栖冢上識者已知
其後必昌熾數傳有名欽者生二子長文次質皆有聲
藝苑質領正統甲子鄉薦文發丁卯解元于是聲華蔚
起人文輩出矣文之子騫舉成化庚子科質之子定成

化乙未進士拱宸與定之子坤俱舉弘治己酉科爲叔
姪共舉增舉弘治辛酉科定之孫鋈嘉靖壬辰進士鄉
會俱以魁選官工部左侍郎食尙書俸鑿與鑿同登嘉
靖乙未進士鑿官南京工部右侍郎鑿終河南憲副鑿
嘉靖辛卯科亦同鑿鄉舉鋈與鑿爲坤出而鑿與鑿又
城出也質之二房孫長舉嘉靖戊子科欽之姪宗舉景
泰丙子科宗曾孫東嘉靖丙辰進士官南京太常卿東
之子嗣煥萬歷壬辰進士終府同知又有曰淳曰拱樞
皆宗人俱以鄉舉一門顯耀有如祖孫媿美叔姪同登
兄弟聯科吁已異矣且一時而伯仲俱官工曹紆青拖

紫爭相輝映海宇爲之推讓焉至于紫誥錫封膠庠里
選更僕未易數也謂曰世家信不誣矣

舊志

金皇統中高平舉子六七輩赴都試憇于韓店一道士徧
視諸生得李晏執其手曰公富貴壽考他年當建節于
此值水敗道賴公治之語畢不見其年登第歷官至中
丞歸老起爲昭義節度使水果敗道父老請修治晏歡
然從之卽今石牖也

通志

明王尙書國光精識鑒一日在高平劉令一相座劉出其
子鴻訓及同學生二孫一張并館師王五人文質之家
宰覽竟驚曰皆公輔才安得萃處一室王文雖工惜福

差不及諸子後孫公居相官司農鼎相官中丞張公慎
言官太宰鴻訓官東閣大學士館師王家礪壬辰登進
士選涇陽知縣未任而卒皆如其言

郭東困諸生時肄業文廟之東廡夜寢陰風忽起數十人
操挺刃剔其骨自頂至踵昏墮移時乃蘇初驚爲賊旋
疑是夢起見滿地皆牛骨人咸異之以爲貴徵云

邑中有鳥曰老鸛每賓興之歲來栖于庠之殿舍其數幾
何士之登科者亦如之鄉人每占爲預報嘉靖丁酉有
五鸛集于庠頃臯一鸛飛于西南是科中式者本庠四
名而澤州閻承光憲原籍高平也鳥之徵異如此

常存仁家城隍廟西就中肄業每夜讀時向神前分燈久之住持道人向常叩禮願爲執役夜供油燭常怪其尊禮忽如此中必有故道人謂曰他日位列台鼎慎勿相忘昨夢城隍神謂曰常之位尊於我屢來分燈使我僕僕迴避于心不安不如就汝舍中取給爲便常聞言開頤曰果如是夢焉敢相忘後果聯捷歷官兵憲

弘治間高平縣廳事後掘得碑有草書絕句額傍並無題識載酒欲尋江上月出門無路水交流黃昏悶倚東風立看去東風獨地愁

列朝詩選

平陽許冲亮與甘肅生冲明友善崇禎間相約汗漫遊至

高平遇牛公子某留憇南關道院牛倏遘家變以千金付許曰事急矣東西南北不可必脫有遇需此金以濟而生不知也居十年所不相聞至國朝牛更名青入監用教習考知縣許方知某尙在告生曰吾守此地負遊約者徒以公子金耳今公子在都門需此必急于是賣金偕往見公子抱許痛哭旣而曰某不肖家私灰燼意中久無此金願奉爲買山資許大恚云亮若利此安待今日幸勿汙我牛改容謝許遂去陟嵩岳不知所終或曰許邂逅宋中一巨公棲遲歿生亦不食死

元薛公世南爲山西僉憲時言一皮匠忽晝見二急脚召

渠云是冥府符命其人令家人作饌供二冥使家人無所見也且語家人曰我生平寡愆雖死必復生慎勿葬我是日果死後三日復蘇云至一官府設王者儀衛一人冕服坐殿廷問曰汝知過否皮匠曰某有生以來未嘗造惡王者命以物如青泥之狀塗其頂久之心骨醒然累世之事皆能記憶王者曰白起坑長平四十萬卒汝不預乎其人乃王紇九世身對曰起坑卒時某阻之不聽非某罪也上帝以某有陰德賜某八世爲將今九世矣俄而起械而至羸瘠一鬼囚也與之對得其情起復押入冥獄夜叉仍送還自後棄所業乘馬出入士夫

家能談其前世事余聞諸王少師文王聞諸薛公云

霏雪

錄

崇禎戊寅王漢令高平一村翁有女爲鬼所据具狀控縣
王卽差隸往攝曰必有以報否則責汝隸不得已持符
市香楮于其村社廟焚而禱之良久空中有聲曰若爲
我來乎若行吾且隨若隸喜過望在路叩問輒隨應但
不見其形狀因遂與俱請縣繳票王曰被犯安在隸曰
偕至矣遂漫呼空中又輒應于是王爲真對責以無禮
鬼曰某納聘三十金非敢亂也翁曰無之鬼爭曰見藏
其家某所地下遣隸還取掘土尺許果得金如數王知

其狡飾怒責之諭令改過鬼喏喏而去自是遂不復至

曠園

雜志

萬歷己丑懷慶民秦萬言與父遺妾角口因而致死萬言
惶懼以白金十兩托韓陽夢轉免掌刑豪書于自知求
活于素與萬言不睦雖得金竟以抵案坐萬言罪萬言
遂憤恨而死于亦未幾云亡又數年韓以贓私逃脫至
高平變姓名爲田某往來邑之平頭丹水姬萬等村日
以訓蒙爲業人不知其爲韓也至丁未夏四月間無故
語諸童子曰余韓姓陽夢其名也二十年前于自知事
發了秦萬言在陰曹告我頭名犯人乃謂妻家中做飯

與衆公差用我寫訴狀一紙候審妻與衆各驚訝至初
八日又曰老爺勾追至矣若與于相辨而對泣者忽倒
地不語移時在地爲受刑杖呻吟之聲衆不忍聞因焚
訴狀跪地求免湏臾忽起曰老爺審理與我無于自知
抵罪萬言解放矣韓兩股青腫兩三月卧床未愈鄉人
方互傳以爲驚異邑之城隍廟丙夜時有士人忽聽廟

庭內有數人對理言似與昭合問之卽四月八日也

舊志

嘉靖間野川民李官素無善行考終鄉人咸以爲漏網方
停屍二日其子夜聞呼號聲意其父回生也相與審視
之其父變爲一牛頭與手足皆牛獨腰腹尙爲人形急

蓋棺揜之棺中咆哮尙數日

舊志

劉國川者鄉之惡人也萬歷壬寅六月六日與子往耕于田時霽日甚烈忽片雲起西北其子謂將有雨勸父歸國川行轉堦下少憇聞石中啾唧意其爲寶也揮鋤劓之忽霹靂一聲火龍自土中起提國川於空子哀鳴求免乃墜於二里外頭以下皆焦爛惟兩腿少存耳

袁主簿宏曹州人嘉靖間署縣印殘虐百姓民以無辜死者數十未幾以貪論黜其鄉人有吳老者夜夢青衣數十向宏家索命吳老夢中勸回青衣者曰伊子後爲山西巡按可雪吾恨至萬歷丁酉吳老之子吳公楷果巡

鹽山西下檄本縣厲壇致祭其文曰昔我曹人名袁宏者作爾縣主簿以貪酷敗官子孫式微萬歷七年七月十一日余先人諱中立夜感異夢見爾縣青衣數人遶袁氏之宅索命索債用言勸回既寤乃命余曰若宦遊山西無忘祭此厲鬼茲夢寐幻景疇敢爲真第福善禍淫天道不爽袁氏剝民肥家旋亦絕嗣承繼孫今已爲人傭矣爾縣之民或被其漁獵或斃于敲朴賁恨以沒遂爲厲鬼今觀袁氏之無後亦可釋恨於九泉余奉上命督鹽此方有伸冤理枉之任特以羊一豕一楮幣椒

漿祭爾有衆爾其鑒歎

舊志

崇禎十三年有遊僧入南關集市敲木魚募化石牌樓下
民間有養雄鷄者突飛僧頂亂啄流血驅之不去每經
過卽如此至四五次市人咸駭爲異遂白之官一加拷
訊盡吐其所作奸狀會刼殺鷄主于鄉下啟屍不獲獄
未成而僧已斃人以爲冤報云

舊志

邑俗男女競雜喜於媚神正月元宵日在金峰山炙石佛
爲遊百病三月十八日集會縣西五里濟瀆池四月十
五日會縣東二里真澤祠女人多乞嗣五月初五日會
米山孫真人廟至于城中鄉社廟宇歲各迎神賽社三
日其俗不遵典禮喜伶人做雜劇喧鼓樂以供祀神

舊志

按迎神賽社男女雜沓西北數省相習成風非止一邑愚民鼓惑誠可駭怪要在隨時隨地體察約束不至別生事端斯亦已耳琳宮梵宇不能盡毀土俗民情卒難變革時會然也高邑風俗號稱儉朴然民間陋習寔有數端殊乖禮義前人言之詳矣略節錄之

梅公建祈神仍從舊俗拜水務使便民示略云水旱在天祈禱惟誠時值亢暘望雨之心官切于民獨旱水之說不可不禁俗傳有旱水卽于其地報一人作主神官祀神之具取給焉神案前置一瓶令童男跪拜始二十四拜日三次次日漸加三日拜無寧刻拜久瓶底生水名

曰聖水旁設一探水官以一滴爲貴多則謂之凶水復拜消去卽天雨而甕底無水亦必令拜其拜水者曰水官其說如此主神官耗財拜水官勞力不至破家成疾不休誰其樂受故名曰捉謂鄉地舉報到官差票強拿也此不誠不公永宜禁止顧遇旱年衆口曉曉謂一捉旱水便可得雨耗財勞力者僅十人降雨則活數十萬人之命卽如此言本縣亦姑從爾俗今于拜水處各捐銀四兩令辦一切祀神之具可免報主神官矣拜水之官隨百里內自願者報名一日一輪毋令力疲心憊云云梅公此示委曲變通順民易俗誠亦善矣顧水旱祈

禱從古不廢自禮經所載春秋繁露所書其法具存心
苟不誠詎能感格捉拜旱水事甚不經耗財傷人胡可
爲訓願亟革之

又梅公勒限速葬示略云自古喪葬俱有定期查集禮職
官庶民皆以三月而葬又律載凡有喪之家必須依禮
安葬若惑於風水及托故停柩在家經年暴露不葬者
杖八十注葬者藏也不藏卽謂之暴露一著于禮一定
爲律誠重其事也查高邑積習率多停柩不葬或浮攢
淺土詢厥由來素封之家多惑於風水年命之說單寒
小戶或爲本族外家索孝帛之類所延獨不思生死既

判人鬼殊途地理福應原屬渺茫儀具繁多摠爲虛器
合行查催速葬並禁裁紙與佛事再三申告其言可謂
愷悌詳明矣袁世燾續司馬溫公墓論略云高平之俗
類多停柩不葬又有淺葬之說詢其由來大抵惑於地
理者什五六貧無力而蹉跎者亦什三四高平習尙好
奢自明器下帳輿馬幃髮齋送之具以及僧道齋壇鼓
吹作樂賓朋弔唁飲食供給之費稍不腆衆共訾焉於
是中人之家以葬爲艱輒假淺葬弛其事待之異日盖
風俗之成久矣獨不思待之異日異日財力之贍與否
不可必也而父母之骸骨與其棺之日卽於朽可必也

仁人孝子必不以天下儉其親然卽儉而葬以視棄而
不葬者孰得而孰失耶况無益之費量爲樽節非必盡
屬惜財禮曰與其哀不足而禮有餘也毋寧禮不足而
哀有餘也則明器下帳輿馬幃翣齋送之具可節福田
因果事屬荒渺智者弗道而鼓樂或近於樂則僧道齋
壇鼓吹作樂可節古之弔者哀孝子之哀毀而病也莫
不爲之致力焉自禮意不明而後喪主之待賓也如常
賓喪賓之待主也如常主先儒深著其失則賓朋弔唁
飲食供給之費可節推之一切豐儉稱其家務使遺骸
得所歸以爲安詎非仁人孝子所愉快者哉余惟移風

易俗君相之事而尤重賴于鄉之賢士大夫蓋言教不若身教也司馬溫國公鄉先生之卓卓可師者其所爲墓論一篇愷切真摯足以發人深省故稍節而錄之且補其所未暢以爲來者勸惟一二通達大體之士躬爲樽節以矯好奢之習而力爭淺葬之非則惑於地理亦漸當悟而思返不過十年其風必能變革無棄而不葬之譏生者死者兩無所憾矣夫喪具稱家之有無死者以入土爲安觀梅公之示及袁君之論有識者其亦可以省矣

袁世燾清浦舉人署任陳初立崇正書院延請掌教緱美焉楊承志俱出其門

又聞邑有取鬼妻之事人而既死骨肉歸土魂氣則散復

何所知移兩家之骸埋於一處死者強締爲夫婦生者
謬聯爲姻親悖理傷義無謂之甚是亦高明之士所宜
急爲勸止也再夫婦人倫之首不幸中年喪偶中饋無
人不得不鸞膠再續要亦喪葬有期骨肉旣寒議之未
晚俗於此事每有迫不及待者結髮之恩胡乃倏忘抑
亦不情之甚矣至愚民惡習向有指產婦爲旱魃之事
自奉例禁近亦漸除若此數端嚴飭類於擾民從便實
傷禮教法語異言是在士君子反覆開陳潛移默革耳
澤郡五屬皆山高土瘠耕者以積糞爲壅灌計否則儉收
矣孟子所謂百畝之糞蓋統上下農夫而均利之每見

居民文契皆載糞池幾區坑屋幾所入券中一有不均
攘臂結訟其俗習如此高平生員祁軾家因淘糞坑吳
起鳳等連斃三命高平褚令因洗冤錄不載糞毒一條
疑案株連竟以歐斃通報嗣委鳳臺羅令檢驗三屍並
無傷痕惟牙根青黑色件作僉供坑積冬糞至春夏
秋三季毒氣鬱蒸墮坑被觸最易斃命蓋糞水臭氣極
猛入口卽死不在糞之深淺凡中此毒者皆牙根青黑
色上下唇吻發青不比中他毒死皮肉起皰骨殖青黑
也聞諸土人解毒法先用柏香焚燒并投柏木片入坑
可辟臭毒又高平魏庄有豫民張敏等販猪爲業因小

猪誤落糞坑二客下坑撈救皆中糞毒殞命驗其牙根
骨青黑色上下唇吻發青與吳起鳳等同是糞毒殺人
較他毒尤甚二案可爲明驗矣恐後人有疑留此備考
並宜添入省寃錄以清寃獄也

府志

高平呂老造墨常山遇異人傳燒金訣煨出視之瓦礫也
有教之爲硯者硯成堅潤宜墨光溢如漆每硯首必有
一白書呂字呂老旣死法不授子而湯陰人盜其名而
爲之甚衆持至京師每硯不滿百錢之值至呂老所遺
好奇之士有以十萬錢購一硯不可得者硯出於陶而
以金鐵物劃之不入爲真余兄子碩所獲而作玉壺樣

者尤爲奇物余嘗爲之銘曰真仙戲幻其璞顧被旣甕
爲有慙德範而爲硯以極其妙則金瓦幾於同價

何遠
春渚

紀聞

澤州李俊民用章舉承安五年進士第一金亡後其同年
三十三人惟高平趙楠僅存又挈家之燕京俊民感舊
遊以詩題登科記後云試將小錄問同年風采依稀墮
日前三十一人今鬼錄與君雖在各華顛又云君還攜
幼去岳燕我向荒山學種田千里暮鴻行斷處碧雲容

易作愁天

淶水亭
雜識

唐安村南山元都院有一泉每旱鄉人禱雨輒應又村北

開帝廟雙松鐵幹虬枝離奇天矯應是秦漢時樹以地
僻鮮賞識者

愚公上心王狀奏六賊表臣聞三乘路遠法界無涯四海
晏清十方安泰忽見魔軍競起侵擾心田六賊既強心
王驚動朝生百怪暮長千邪幻惑真如囚牢法體菩提
道路隔絕不通破壞涅槃傷殘三寶無爲珠玉悉被偷
將大藏法財皆遭劫奪塵勞翳日慾火亘天燒蕩國城
焚漂聖境臣乃見斯紊亂恐正法以難存遂與六波羅
密商量同爲剪滅遣自性爲密使探候魔軍見在五蘊
山內潛伏約有八萬四千餘衆已知姓字號計剎那臣

遂檢點十八界之雄兵兼立體空爲號令人人有無垓
之力各各懷勇健之心掛堅固鎧執三昧鎗智箭禪弓
光明慧劍先鋒有見性之能力士有奪關之德向大乘
門中訓練寂滅田內調伏選三明嶺上屯師八正路頭
布陣舉大覺性爲都總管遊奕四方統領法界生擒妄
想之徒活捉無名之輩請慈悲王破三毒之寨差忍辱
將破慳慳之城精進太保除傲慢之妖喜舍郎君滅慳
貪之賊臣又向平等川中下寨把斷十惡之門般若谷
內行兵毀盡八邪之路逡巡魔軍大舉殺氣衝天臣乃
號令摩訶般若同時入陣各運神通遞相着力當此之

際眼不觀色耳不聽聲鼻不嗅香舌不了味身不覺觸
意不攀緣勇猛向前念念不退兩陣交鋒魔軍大敗六
賊全輸勦戮無邊掃除蕩盡收下妄想捉獲無明領就
涅槃場內以慧劍斬爲三段煩惱林當時催折人我山
碎作微塵愛網用智火焚燒欲海俾自然枯竭致使三
明再朗四智重圓心王坐歡喜之殿真如登解脫之樓
自性處無碍之堂三身居不搖之地從茲法界寧靜永
絕喧囂渡生死之愛河達菩提之彼岸魔軍已滅謹錄
奏聞謹奏表

高平前輩著作見於通志府志經籍錄及他文所載

正亦不乏加意訪求奈見者寥寥其名目固不可沒也附識於此

晉王叔和金匱玉函八卷脈經十卷脈訣四卷脈賦三卷
孩子脈論一卷脈訣機要三卷張仲景藥方十五卷又
傷寒卒病論十卷金匱要畧方三卷

唐釋大愚韻母

宋李異切韻門庭

金晁會泣水集秦志林泉集二十卷

申萬全 盧洵 陳載俱有集見通志

李晏遊仙野人集禁庭制作集

趙可玉峯散人集

李仲畧丹源鈞徒集

元張起岩韓維學泣水倡和集

明畢璽石屏文集石屏詩集家乘錄

劉虞夔日錄聞見十卷毅語二十卷中和堂稿宮詹文集

郭銓一泉稿

郭鑿翰林詩稿國學文集居家六字

郭東類博錄

郭嗣煥長春集文集

國朝畢振姬尚書注四州文獻三川別誌西北文集西河遺教

李棠馥息園詩集

張汧壺陽集一掬冰四集

崔子明經國大業集丹頭地集省身錄讀書聲

陳烜嬾逸集

趙介槐園初筆

李京字學正本

牛兆捷博韓集陶史草十卷

牛兆鼎左傳十國紀事本末序論南園詩草評騭莊子

文選李義山詩

張聯璧愛吾廬稿

姬鼎燕苦吟集

李培蔭菊圃詩草學園摹古文集

畢濛知非集宦遊集

祁瑾通鑑編年錄龍右詩句鷄肋集

石中玉句典摘萃傷寒尊是血症瑣言本草談真雜症
瑣言

按信則徵信疑以傳疑史法也雜志所載事近支離
而事實良有足徵本書微相附麗爰叢列焉傳信傳

疑固亦古人例也